

國學基  
本叢書 珂  
雪 詞



書叢本基學國

詞 雪 珂

著 吉 貞 曹

行 發 館 書 印 務 商

中華民國二十八年七月初版

(81104 2)

國學基  
本叢書  
珂雪詞一冊

每冊實價國幣叁角

外埠酌加運費臨費

著者 曹貞吉

發行人 王雲五  
長沙南正路

印刷所 商務印書館

發行所 商務印書館  
各埠

G 五三五上

(本書校對者章德宣)

# 序

言爲心之聲。凡其言可以垂世傳久者，必其人足以命世。世不能用而後出于此。上之建立宇宙，綱維世道，如尼山之脩明六藝，次亦特抒卓識，使後世見其心于斯人斯世中，如莊周、屈平之儔，故其言炳然不可磨滅，千萬世誦之弗衰。典謨降而子史，三百篇降而離騷樂府，則時會使然，正不必限體于古今常格也。羅近溪有云：聖諭六語，繼統于虞廷十六字，夫人心道心，危微精一，執中之旨微矣。孝順父母之語，愚頑童稚，誰不能言，而謂繼統虞廷，可乎？然非妄也。庸俗之言，皆古聖身體所發，習焉不察，安望其行著，故舜好察邇言，爰稱大智。天道聖教，豈外于庸言庸行哉？子史離騷樂府，皆所謂自見其心者，自樂府變爲近體，近體禮爲詩餘，識者有江河日下之歎，而黃庭堅謂晏殊之詩餘，爲高唐

神女之流。張耒謂賀鑄之詞。如屈宋蘇李。此豈無見而漫言。蓋所遇者天機。不復計其形貌。卽童謠婦歎。無不有至微寓焉。此亦伯樂相馬之說。運之腕舌。則庖丁之解牛已。二三十年來。詩屢變而下。學士髦俊。出其餘勇于詩餘。詩餘則屢進而上。安丘曹實菴先生。以詠物懷古諸編。爲海內所推。予受珂雪詞讀之。眞如仰崑崙。泛溟渤。莫測其所際。骯髒磊落。雄渾蒼茫。是其本色。而語多奇氣。愉悅傲睨。有不可一世之意。至其珠圓玉潤。迷離哀怨。於纏綿款至中。自具瀟灑出塵之致。絢爛極而平澹生。不事雕鏤。俱成妙詣。其融篇。則如萬頃澄湖。千重巖嶂。長濤細漪。隨風而成。瓌異秀冶。觸目而得。琢句。則如鑿金結繡。層剝蕉心。天成于初日芙蓉。不盡于抽絲獨繭。鍊字。則險麗搖曳而生香。雋逸蜿蜒而流奕。洵乎此宗之大家。不但於蘇辛秦李姜史分其一席而已也。先生命世長才。無心游藝。卽詩文之高妙。不足以概生平。況于詞之末技乎。就詞想其胸次。

甚有似于莊周。莊周識高學廣。思密才雄。故其言洗洋縱恣。不可端倪。先生無境不超。有途必入。引之以孤緒。而運之以浩瀚流連。故觀者如溫嶠之照牛渚。韓愈之登華山。伯牙之移情海島。非斯世所常聞見。而留與斯人賞奇如莊屈。誠藝林之奇邁也。蓋先生生于鄒魯之邦。身尼山之教。而於天道人事之氣運。靜觀默會于升降之數。苟一旦得時而乘。轉淒婉纖艷之情。爲風雨雲雷之用。驅龍蛇虎豹。以禦疆圉。使麟鳳接武廟堂。海內之人。因詞而見其心。以珂雪比于廣平梅花之偶興。則斯詞也。其不朽之先聲矣。新安王煒篔。

## 珂雪詞序

六義之學。至揚馬而乃浩瀚。故昔人以能賦爲大手。比來文士。賦殊寥寥。固宜歸之詞曲明矣。夫聲律始於八閩。此星宿海也。而其氣與天地之氣相通。天地之氣日開。故聲律之道亦日暢。而詞曲中之天地亦復曠然無盡。三唐可謂四瀆行地。浩淼千秋矣。至滄溟所歸。非宋詞元曲將何屬焉。蓋所貴乎大海者。蛟龍出沒。風雨驚飛。天地迴旋。日月隱現。詞曲亦然。於六義中變賦之體而得風之用。故非五七言詩之所可盡矣。前人漫有軒輊。矜其所長。文人習氣耳。恐未爲定論也。今日之以詞曲名海內者。指不勝屈。而實菴之詞。則鎗鎗先鳴。跗注之君子。往往壁上觀矣。予每讀實菴之詞。驚魂蕩魄。懔懔不定。初讀弔古諸作。慷慨悲涼。羽聲四起。如逢祖士雅。劉越石諸人。旣而讀詠物諸作。入微窮變。五

色陸離。又若樹珠幢于谷王之曲。而百寶鬘赴也。已乃過實菴所。求諸作盡讀之。無體不工。而田居世外之音。往往而遇。如聞魚山之梵。兩腋生風。五濁欲洗。又疑非金馬直廬間人也。因復更有請焉。陸海局促。蚊蝸一器。啾啾耳。神遊八極之表。攬化人之袂而上征者。亦有人乎。然而左思曹唐。尙窘邊幅。玄風未暢。是則吾所深望于實菴者。倘肯走筆。貺我。當拍洪厓之肩。瀝酒曼聲而歌之。步虛之音。上薄禹餘黃曾。天上九華紫微諸仙子。安知不拊雲璈而和之乎。客謂予曰。實菴生有異徵。蓋自比丘中乘願來者。淡於榮利久矣。今不究粲可之宗。而反抽秦黃之簞。綺語未盡。毋乃爲秀鐵面所呵歟。予听然而笑曰。是未可執也。夫慧業文人。宿習難淨。迦葉聞琴。固其所也。而義之予奪。有殊實際理地。一字未盡。便成毒鳩。卽古德青龍疏鈔。亦須付咸陽一炬。至于縱橫入妙。能轉法華。則本來寂滅。不礙鶯花。文字性離。無非般若。頻呼小玉。亦可證入圓通有餘。



矣。實菴方究研佛頂尊經。果能鞭心于此。離卽離非。能所何礙焉。況區區花間  
蘭畹。遽至仰流虛空耶。吾將就實菴而叩之。東蒙高珩題。

## 詠物詞序

霜凋魏帳。月中之剩瓦何多。水咽秦關。地上之殘城不少。天若有情。天寧不老。石如無恨。石豈能言。銅駝殼棘。恆違秋至。以偏啼。銀鴈簷沙。慣遇天陰。而必出。山當雨後。易結修眉。竹到江邊。都斑細眼。溯夫皇始以來。代有不平之事。千年關塞。來往精靈。萬古河山。憑陵鬼物。縱復人稱恨甚。事柰愁何。江淹工愀愴之辭。鮑照擅蒼涼之賦。正恐世閱世以成川。年復年而作谷。捧黎陽之土。堙此何窮。積函谷之泥。封來不盡。然而劍鋒盡缺。總爲旁觀。壺口新殘。只因細故。青史則幾番劉項。誠然於我何堪。黃河則滿地袁曹。遑曰干卿奚事。或蝦蟆陵上。暮年紅袖所閒談。或鶴雀樓邊。故老白頭之夜話。或武擔過客。曾看石鏡於成都。或盤屋居民。偶得銅盤於渭水。苟非目擊。卽屬親聞。事皆磊砢。以魁奇。興自顛。

狂而感激。搥牀叫絕。蛟螭天矯於胸中。踞案橫書。蝌蚪盤旋於腕下。誰能鬱鬱。常束縛於七言四韻之間。對此茫茫。姑放浪於減字偷聲之內。唵成十闋。事足千秋。趙明誠金石之錄。遜此華文。郭弘農山海之編。慙斯麗製。嗟乎。煙霾天水。囂宮既蔓。草千堆。浪打章門。灌廟亦殘。陽一片。悲哉季札。劍影徒青。逝矣劉郎。奩痕尙紫。銀槎泛斗。難追博望之勳名。彩筆凌雲。空羨馬卿之詞賦。何況長平。繡鏃恨血全紅。大食冰蕩。愁雲半黑。織成魚素。粘海氣以猶腥。掣得龍髯。鼓天風而倍怒。豈非謔語。請出出。諾皋之所未收。怪怪奇奇。齊諧之所不載者哉。僕每怪夫時人。詞則呵爲小道。儻非杰作。疇雪斯言。以彼流連小物之懷。無非淘洗前朝之恨。人言燕市。實悲歌慷慨之場。我識曹君。是文采風流之裔。狂歌颯沓。聊憑鳳紙以填來。老興淋漓。亟命鸞笙爲譜去。陽羨陳維崧題。

# 題辭

賀新涼

陽羨陳維崧 其年

滿酌涼州醞。愛佳詞、一編珂雪。雄深蒼穩。萬馬齊喑蒲牢吼。百斛蛟螭困蠢。算蝶拍、鶯黃休混。多少詞場談文藻。向豪蘇、膩柳尋藍本。吾大笑、比蛙黽。熱殘樺燭剛餘寸。歎從來、虞卿坎坷。韓非孤憤。耳熱杯闌無限感。目送塞鴻飛盡。況眼底、羣故袞袞。作達放顛無不可。勸臨淄、且傳當筵粉。城柝沸、夜烏緊。

前調

次韻答贈曹舍人京師見寄之作。

舊山鄧漢儀

孝威

名士盈東國。更曹家賦詩橫槊。英豪無敵。珥筆縱隨丞相後。聲價由來赫奕。看落筆、羣公動色。日轉宮槐催蕢酒。笑停鞭、大道青樓側。如此事、何人得。昔年也作燕臺客。到于今、攀龍屠狗。人都間隔。黃水西風黃葉下。落得啾啾唧唧。喜

雄篇蒼鷹怒擊。寄到邗溝明月下。快高吟紅蠟銷三尺。空遠望西山碧。

霓裳中序第一

桃鄉農李符 畊客

紅絲小硯北。不斷閒情。渾似織。東魯詞人第一。勝飄泊周郎。鬻洲漁笛。犀幃夜  
寂。寫錦箋都洗香澤。銀釭下喚來翠袖。記曲譜瑤瑟。疇昔酒瓢吟屐。記踏遍  
銅駝巷陌。旗亭曾畫素壁。破帽重尋。斷闕空憶。紫薇花下客。更引起年時賦筆。  
增惆悵。尊前舊侶。鏡裏鬢絲白。

天香

由拳沈季友 客子

銀沫香邊。翠鬟聲裏。思君風調曾折。燕市重來。鞭絲問處。便有桃鄉人說。紫苔  
雙破。怪小徑冷於吹雪。拚擋書籤茗椀。料應此意清絕。東華幾堆官熱。算爭  
如滿毫花屑。笑指池頭鳳影。風流誰奪。我本飄零殘客。儘狂舞秋山。一丸月。願  
作團光。照人時節。

水調歌頭

舟中作

心齋張 潮山來

買棹故鄉去。冰雪喜隨身。中流鼓柁，鼓坐對此陟釐紋。不用紅牙鐵板，且趁曉風殘月。銅斗擊來頻。讀罷兩三闋，齒頰欲生芬。彼秦黃，與蘇陸，亦何神。雄深蒼穩一嘆。陳檢討其年評公詞雄渾蒼穩。欣賞共奇文。試看高懷弔古，以及閒情詠物，浣筆絕纖塵。願得有心侶，枕祕散氤氳。

畫屏秋色

錢塘吳陳琰 寶崖

曾借菑州住。對二老。念東、豹岳兩先生。哦盡陳思妍句。翩若驚鴻，飄如迴雪，洛神親賦。簾閣坐焚香。又報道津亭催鼓。指皂蓋，天都路。想車過黃山，芙蓉疊疊，多少酒痕墨瀋。香雲遮護。懷古溪村林塢。記任昉風流遺處。爭如司馬官閒衙散。頻修簫譜。眉子硯將穿。朝朝傳寫紅牙度。轉笑青衫徒苦。我正倦遊歸。回首齊烟九點。夢斷那時人語。時余方辭濟南太守修志之訂。

## 詠物詞評

王阮亭先生曰。拾遺洞冥。杜陽雜編諸書所記。類無事實。實菴先生詠物。皆取其聞見所及耳。而神光離合。望之如蜃氣結成樓閣。每讀一過。覺江風海雨。撼撼生齒牙間也。

朱錫鬯先生曰。詞至南宋始工。斯言出。未有不大大怪者。惟實菴舍人意與予合。今就詠物諸詞觀之。心慕手追。乃在中仙叔夏公謹諸子。兼出入天游仁近之間。北宋自方回美成外。慢詞有此幽細綿麗否。若讀者仍謂不如北宋。則舍人亟藏之。俟後世子雲論定可矣。

宋牧仲先生曰。今人論詞動稱辛柳。不知稼軒詞以佛狸祠下一片神鷗社鼓爲最。過此則頽然放矣。耆卿詞以關河冷落。殘照當樓。與楊柳岸曉風殘月爲

佳。非是則淫以褻矣。迨白石翁崛起南宋。玉田草牕諸公。互相倡和。戛戛乎陳言之務去。所謂如野雲孤飛。去留無迹者。此竹垞論詞必以南宋爲宗也。今讀實菴詠物十首。彷彿樂府補題諸作。而一種宵渺之思。瑰麗之辭。與夫沉鬱頓挫之氣。直駕諸公而上之。擬諸白石。暗香疎影之篇。何多讓焉。義山曰。願書萬本誦萬遍。口角流沫。右手胝。余於此詞亦云。



## 懷古詞評

高念東先生曰。吾讀諸詞。想見實菴擗管時。必連浮大白。踢足起舞。高唱梁伯龍。問天涯。何事恰纔歸。曲數過。然後用葉法善攝魂碑法。令荆卿舞劍。漸離擊筑。紅線捧硯。隱娘濡筆。阮步兵太息之聲。庾子山涕洟之賦。一時並集。乃克有此耳。轉而思之。存亡崇替。此是人間常事。斷不可免者。其不實則乾闥婆城。不久則邯鄲道枕耳。諸公泉下回首。或能筦爾發愿。一出頭來。必了因緣大事。另作生活。方是英靈男子。如尙悲思不已。生旣猙獰。死復沉滯。再來依然故吾耳。萬劫黑海。尙有分在。可憂也。僕學空門。而亦爲之怦怦心動。方知俗心難盡。習氣難空。如此大須懺悔。祓除。庶幾不復墮情想濁劫乎。

王阮亭先生曰。填詞小道也。然魯直謂晏叔原樂府。爲高唐洛神之流。張文潛

謂賀方回幽潔如屈宋，悲壯如蘇李。夫屈宋三百之苗裔，蘇李五言之鼻祖，而謂晏賀之詞似之，世亦無疑二公之論爲過情者。然則填詞非小道可知也。實菴舍人久以詩鳴海內，近爲樂府，輒至數百首，分其一藝，足自名家。今所刻懷古四闋，詠史五闋，特其凌雲臺之一椽一桷耳。然已可推倒一世，開拓萬古。吾故不敢自擬魯直文潛，而竊欲躋實菴於宋玉陳思屬國都尉之間。世不乏賞音，其或以吾爲貢諛者，吾亦任之。

張杞園曰：昔人論詞，以七郎清照爲當家，以其纏綿旖旎，動人情思耳。余謂不如東坡稼軒，慷慨雄放，爲不失丈夫本色。今觀實菴數闋，意興淋漓，胸懷浩蕩，至其上下千古，則一往情深，低徊欲絕。實之蘇辛集中，寧易差別邪？實菴詩才奔逸，橫絕一世，詞卽不足以盡實菴，而茲刻又不足以盡實菴之詞。讀者亦窺其一斑兩斑可矣。

張山來曰。珂雪詞縱橫變化。不可方物。非辛非柳。非蘇非黃。非周非秦。而辛柳蘇黃周秦之美畢備。由其才具閎博。學殖淵邃。舉生平所誦習子史百家。古文奇書。含咀醞釀而出之。淺陋之士。烏能窺其堂奧。測其涯涘哉。

## 詞話

實菴兄爲人端飭不苟訾笑。至填詞乃婉麗纖媚。時或飛揚跋扈。倣詭不羈。此彭澤閒情。廣平梅花。令人不能測識也。

蛟門自負詩歌不可一世。獨以文章讓予。填詞推實菴。三人每酒酣爭勝。氣不能下。近予頗爲長短調。實菴怒罵曰。汝不思壓倒蛟門。乃闢吾藩籬耶。吾將爲古文辭矣。予曰諾。請屬橐籥以從。時田子綸。雲顏。修來。光敏在座。爲之捧腹絕倒。

柳生敬亭以評話聞公卿。入都時邀致接踵。一日過石林許曰。薄技必得諸君子贈言以不朽。實菴首贈以二闋。合灑尙書見之扇頭。沉吟歎賞。卽援筆和韻。珂雪之詞。一時盛傳京邑。學士顧菴叔自江南來。亦連和二章。敬亭名由此增。

重。

阮亭先生閱實菴懷古風流子數闋。拍案稱善。題其稿曰。曹大乃爾奇絕。詞以神氣爲主。取韻者次也。鏤金錯綵其末耳。本朝士大夫詞筆風流。幾上追南唐北宋。彭王鄒董。夙擅嫩聲。近來同人中。惟錫鬯。蛟門。方虎。實菴。超然並勝。實菴不爲閨襜靡曼之音。我視之更覺嫵媚。其神氣勝也。

寶應陶處士激入都門。呼予與實菴爲南曹北曹。友朋間遂以此爲稱號。今讀珂雪詞。予雖十年學。不能並驅也。昔人稱銜官屈宋。實菴銜官我有餘矣。

王元美論詞云。寧爲大雅罪人。予以爲不然。文人之才。何所不寓。大抵比物流連。寄託居多。國風離騷。同扶名教。宋玉賦美人。亦猶主文譎諫之義。良以端言之不得。故長言詠歎。隨所指以興焉。必欲如柳屯田之蘭心蕙性。枕前言下等語。不幾風雅掃地乎。實菴詞無一語無託者。予之所以服膺也。

雲間諸公論詩。宗初盛唐。論詞宗北宋。此其而而不能離也。夫離而得合。乃爲大家。若優孟衣冠。天壤間只生人。人已足何用有我。實菴與予意合。其詞寧爲創。不爲述。寧失之粗豪。不甘爲描寫。妍媸好醜。世必有能辨之者。

康熙歲次丙辰夏五江上年弟禾具草。

# 珂雪詞目錄

## 卷上

蒼梧謠二調

烏夜啼

浣溪沙五調

減字木蘭花十調

山花子三調

玉連環

留春令

望江南二調

賣花聲六調

鷓鴣天

木蘭花二調

虞美人

南鄉子七調

夜行船

醉落魄

虞美人第二體

蝶戀花二十調

漁家傲二調

蘇幕遮

添字漁家傲三調

青玉案

江城子二調

風入松

越溪春

御街行

祝英臺近二調

一叢花

柳初新

瓜茉莉

簇水

喝馬一枝花

惜紅衣

滿江紅六調

惜秋華

掃花遊

露華

滿庭芳三調

水調歌頭六調

天香二調

玉簫涼

暗香

留客住

水晶簾

尾犯

燕山亭

孤鸞

雙雙燕二調

金菊對芙蓉

月華清

催雪二調

月下笛

玲瓏四犯

鎖廳寒三調

百字令十一調

卷下



解語花三調

渡江雲二調

珍珠簾二調

木蘭花慢三調

桂枝香

齊天樂二調

水龍吟四調

憶舊遊

瑞鶴仙

宴清都

花犯

臺城路三調

柳色黃

拜星月慢

霓裳中序第一二調

綺羅香二調

瀟湘逢故人慢

永遇樂二調

消息

秋霽

南浦二調

花發沁園春二調

尉遲杯

望遠行

解連環

一寸金

風流子五調

疏影三調

八寶粧

霜葉飛

蘇武慢

惜餘春慢

沁園春十一調

八歸

賀新涼十七調

摸魚子八調

金明池

笛家二調

畫屏秋色二調

蘭陵王

大酺

玉女搖仙珮二調

多麗

小諾皋

哨遍

鶯啼序

補遺

卜算子

浪淘沙二調

木蘭花

春草碧

滿江紅

百字令

木蘭花慢

臺城路

# 珂雪詞卷上

安丘曹貞吉實菴著 同學 諸子評選

## 蒼梧謠

團扇舊猶堪贈所歡，秋風起戀戀故人難。  
寒澗水鄰鄰白石間，終難去滄海作波瀾。

王阮亭曰：短闕最古。有漢魏樂府遺音。彭羨門曰：寄託遙深。沈鳳子曰：彷彿香片玉體。風致自佳。

烏夜啼 詠水葱·用葱字韻

琅玕出水玲瓏，鬱葱葱好伴，蓴絲芡葉，雨聲中。  
竹影織苔痕濕，顛西風，比似箇人眉黛，可相同。

浣溪沙 步阮亭紅橋韻

幾曲清溪泛畫橈。綠楊深處見紅橋。酒帘歌扇暗香銷。

白雨跳波荷冉冉。青

山擁髻水迢迢。三生如夢廣陵潮。

陳其年曰：諷詠結句，令我柔情一往如水。羨門曰：三生如夢廣陵潮。比十年一覺揚州夢，相去多少。

水過雷塘鳴咽流。繁華人逝幾經秋。二分明月自揚州。

玉樹歌來猶有恨。錦

帆牽去已無愁。平山堂下是迷樓。

羨門曰：意在言外。不待人言愁始欲愁也。

又題  
畫。

蟹舍魚莊此地偏。陰陰灌木水平田。江湖無恙白鷗天。

菱葉蘆花迷遠渡。斜

風細雨擁歸船。漁翁何處枕蓑眠。

羨門曰：江湖無恙白鷗天。是錢劉佳境。然畢竟入詩不得。解人自知之。鳳于曰：分付沙鷗。儘堪無恙。

又成偶。

飛鳳將雛紫玉釵。雙鸞小樣合歡鞋。卓金車子響銅街。濯錦江頭朝復暮。踏  
青陌上去還來。紅樓斜日費安排。

鳳于曰。隨  
手間妙。

又

宛轉紅絲結鼓忙。避人學繡睡鴛鴦。朱朱粉粉自成雙。雪作鴉兒纖手法。香  
拖髻子緬蟲光。夜深待月下迴廊。

減字木蘭花

雜憶。

掀髻抵几。孤憤精神兼數子。磨蝸星辰多難如君更幾人。文章休論一擲副  
車千古恨。五十年光只與劉蕡共斷腸。

其年曰。直教桂子落墳上。生得  
一枝恨始消。與此詞同一悲愴。

戊申六月。萬里驚心鰲背折。一夜罡風。只有才人瓦礫中。神仙詭異。露滿金

莖曾乞未傲骨峻嶒化作中林鬼火青

曹娥媚曰·韋相國四月十七·同一起法·

偶然游戲人道東方真玩世君曰非狂歷落嶽崎也未妨

當年花底斗酒雙

柑吾共爾黃葉東村車過難爲腹痛人

阮亭曰·具此才筆·便不至作蘇辛儻隸·

相逢濟上桂子三秋花始放天碧槐黃輸却南豐一瓣香

禪房秋暮揮手登

車從此去歲月侵尋鈴鐸蕭蕭感我心

竹林未遠泉下定知憐小阮今我來思風雪時時夢見之

傷心伯道住世何

如歸去好仙路匆匆一七丹砂誤乃公

李武曾曰·喃喃如話·

當年繡虎才子人稱何水部臥病滄江三載茸城信杳茫

惟君知我落落名

場無一可。今竟何如。悔不同驅下澤車。

羨門曰：彌淡彌真。阮亭曰：與第三首並是絕妙。

三年伏枕落拓無何惟日飲。柳七填詞減字偷聲或有之。王孫驢背古錦奚囊拋得未不用傷神。大有長安失路人。

黃茅瘴雨萬里歸來悲自語。夢裏依稀石髮蘿烟晝掩扉。磨厓草檄幕府應

徐斑管筆離緒茫茫何獨鯁生感對床。

武曾曰：石髮蘿烟。先生殆指予昔年句也。往事綿綿。不覺無然於此。羨門曰：八詞促節繁情。讀之令人神損。其年曰：八詞歷亂摧藏。迷離斷續。擬之古人。殆章

華九招。同谷七歌也。

又天津道中。

青衫羸馬野渡官橋誰問者。黃葉莊村掛壁燈昏自掩門。連宵急雨雁陣橫斜天際去。丁字沽邊蟹斲魚罾望渺然。

白雲紅樹。一路秋蟲相共語。幾縷朝霞。遙指東溟是我家。長河百折。浪捲蘆花堆似雪。舟子灘邊。擊汰揚舲橫索錢。

山花子

歲暮

歲暮眞同赴壑蛇。一天風色話棲鴉。又是黃昏新月影。上梅花。屋角漸高星幾點。人聲欲靜鼓三挝。誰道壯心渾似鐵。不思家。

阮亭曰：澹處亦是宋人。其年曰：直得妙。

又題石林小照

鬢影花光撩亂俱。紛紛蝶翅接蜂鬚。共鬪南唐金葉子。阿誰輸。寶抹紅絨香菡萏。冰綃白映玉芙蕖。陶令閒情何所寄。美人圖。

武曾曰：江淹片錦。尙堪分贈丘遲。

又爲人題簾上畫松



五鬢蒼然人畫圖。一灣流水帶平蕪。昨夜驚濤吹欲落。響金鋪。曾在天台山下見。霜皮黛色記來無。彷彿溪南橋畔路。第三株。

玉連環水仙。

盈盈似隔紅塵路。陳王休賦。黃昏不是。乍聞香。月底更無尋處。靜掩繡簾朱戶。更聽微雨。青溪溪畔女郎祠。髣髴見魂來去。

留春令感舊。

簸錢堂上。避人羞傍。櫻桃花樹。半篙春水送蒲飄。便沒箇相逢處。今古傷心常如許。紫玉成烟苦。不是垂楊慣飛綿。被幾陣東風誤。

望江南代泉下人語。

黃墟杳。寂寂恨難窮。荒草路迷寒食雨。白楊聲亂紙錢風。掩泪拜殘鐘。繁華歇。金屋夢魂中。陌上人歸翁。仲語林邊火入寶衣空。土氣蝕青銅。

嗚咽水腸斷爲誰流。燐火不隨山雨暗。蛩聲常伴故人愁。白骨怯清秋。千年  
事。零落委荒丘。青塚魂歸環珮冷。珠襦香散土花留。無語泣長楸。

其年曰。劉劉竹間雨。焚焚窗下燈。相逢不相顧。含淚過  
巴陵。此昔人所作鬼仙詩也。此詞幽悄寂歷。髣髴同之。

賣花聲 簾下美人影。

對面尙參差。難慰相思。東風無力畫簾垂。薄霧冥冥春未曉。掩映花枝。蟬影  
亂罨。似隔天涯。金鈎雙控是何時。獨立窺人人不見。捲上些兒。

淡門曰。小開罵春風。是憎其開。東風無力畫簾垂。是憎其不開。阮亭曰。寫得歷  
亂恹恹。令人魂銷。其年曰。細膩風光我獨知。武曾曰。不惜卷簾通一顧。伯君  
着眼未分明。與此  
結句誰實誰主。

又秋夜。

風緊低窗鳴。秋氣淒清。淡雲籠月未分明。雨點疎如殘夜漏。滴到三更。無計  
破愁城。夢斷魂驚。一天黃葉雁縱橫。不待成霜霜滿鬢。短髮星星。

阮亭曰：前段雨點句  
妙。後段黃葉句妙。

又丁巳清  
明。

烟草似愁生。綠滿長汀。隔牆一一賣花聲。十日雨絲天作劇，渲染清明。  
乍啼鶯樓外峯青。東風拂面酒微醒。欵帽垂鞭何處去，淪淪寒輕。

林外

其年曰：輕攏慢撚。不使一呆筆。古人解此者。惟  
張三影耳。鳳子曰：乍雨乍晴春易老。點染絕佳。

又不寐口  
占。

雨氣沒高林。庭院深深。流螢如豆草如針。又是嫩涼時候也。只欠疎砧。  
杳難尋。雲水沉沉。海南花發土牆陰。斜月窺人人未起。冷浸孤衾。

舊夢

鳳子曰：李後  
主得意語。

又詠鼓子  
花。

虛負此花名。聽去無聲。斷雲殘雨過荒汀。撼撼悽悽聞響答。也欠分明。

宜傍

戰場生畫角連營。青山不動氣縱橫。廣樂鈞天誰間作。溪畔蘆笙。  
懶去報晨衙。淨洗鉛華。虛名那受錦堂搨。誰把山香翻一闋。落盡庭花。  
冷蒹葭。蕭瑟堪嗟。却疑三弄走寒沙。老矣岑牟無感慨。不用喧嘩。霜重

鷓鴣天

腰站·和璧  
問女子韻·

門裏桃花想去年。幾回惆悵晚風前。餘情難續雲藍袖。舊恨仍留唾碧衫。  
雙淚落。一鐙懸。魂銷只有夢相關。生平怕近楸紋局。纔到中心不忍彈。

木蘭花

鞠觀玉  
哀詞·

依然笳吹春明路。丹旄飄搖何處去。故人強半白衣冠。淚濕幽州城下土。  
歡日暮。渾無據。昨日驪歌今薤露。老親垂白望歸來。精爽冥冥隔烟霧。  
悲

武曾曰·如聽  
隴頭鳴咽水·

又春  
晚·

靡蕪一剪城南路。弱絮隨風亂如雨。垂鞭常到日斜時。送客每逢腸斷處。惺惺門巷春將暮。樹底鶯紅愁不語。畫梁燕子睡方濃。落盡香泥却飛去。

虞美人有感

三春誤向風塵走。空負長條柳。落花流水思悠悠。便是玉簫金管也生愁。傷心慣作人間別。夢裏添嗚咽。伯勞飛燕去匆匆。消受一窗殘月五更鐘。

羨門曰：如此消受亦極不惡。武曾曰：妍在澹中。

南鄉子夏夕無寐。茫茫交集。輒韻語寫之。不求文也。

兀坐寂無歡。檢點平生一笑難。四十年來渾是夢。邯鄲。得得青驢尙未還。往事總闌珊。不待新愁鬢已斑。試問從前誰誤我。儒冠。燕壘蠶絲卒歲艱。

羨門曰：此調第四句止用兩字。頗難安放。邯鄲。儒冠。兩成妙押。

少小憶趨庭。總角齊肩好弟兄。嘗得熊丸心自苦。同聽夜雨連床十載聲。有

約待躬耕。白髮慈親望眼。誰料而今成幻影。飄零瘴雨蠻烟一帶青。

鳳于曰：汾水雁飛。  
含情正在不盡。

文酒憶同遊。雅會西園事事幽。惆悵落花飛絮急。悠悠笛裂山陽曲未休。  
已痛西州文采風流。土一丘。他日隴頭看宿草。颼颼石馬無聲起暮愁。  
德耀憶同棲。兩小無猜稚齒齊。冷雨篝燈頻下淚。牛衣十載行踪愧老妻。  
草送將歸。白馬青絲事已非。膝下癡兒應念我。誰知片片浮雲各自飛。  
江上憶鳴榔。杜宇聲中過夏長。回首敬亭濃翠裏。蒼茫白苧何人勸一觴。  
子好湖光。十里荷花繞畫塘。記得吳山觀落日。悲涼。嗚咽寒潮勢未降。

阮亭曰：先兄往有減字木蘭花七首。同此情事。旅  
夜孤檠。讀此令我腸斷矣。其年曰：字字嗚咽。

又砧聲。

霜信到邊城。人夢龍沙萬里程。秦女捲衣何限恨。淒清。歷歷君聽空外聲。  
風

急亂殘更△乍密還疎似有情△想見紅闈纖手怯△亭亭靜倚朱欄待月明△

其年曰·骨  
肉停勻·

又詠  
燕·

雙燕坐雕梁△軟語呢喃晝自長△掠水蹴花飛不定△過牆亂剪春蕪故故忙△新

月淡昏黃△柳絮池塘夜未央△落盡香泥人不見△迴翔錯認誰家白玉堂△

羨門曰·梅溪以長調擅場·此復以片言居勝·阮亭曰·掠水蹴花三句·爲燕  
燕傳神·亂剪春蕪·得未曾有·其年曰·字字搖曳·與邦卿作·異曲同工·

夜行船  
本意·

十幅蒲帆風力勁△有魚床夜燈相映△兩岸衰蘆一條寒碧△波影月痕難定△柔  
櫓無聲人語靜△怕沙鷗暫時驚醒△篷背新霜山邊曉市△楓葉亂遮笭箬△

醉落魄  
鷹詠·

凍雲慘淡△鬱輪囷天邊心膽△鞦韆欲掣金眸閃△雨血風毛一灑平原暗△層霄

呼下纔如點。割鮮小飲。霜花蘸藍田。歸騎垂弓劍。野闊天低。狐兔山中減。

其年曰。押險韻如使硬弩。無不射麋麗龜。

虞美人 雨過第二體。

錢塘戰後風雷弱。貴主還宮樂。靈旗捲罷楚天高。湘妃鼓瑟和雲璈。擁鮫綃。長空一抹曾青色。全學柴窑碧。諸峯螺翠晚來橫。烟鬟霧鬢劇多情。可憐生。

其年曰。渲染欲滴。

蝶戀花 荔裳席上作用阮亭韻。

吹面東風能散纈。雨弄柔絲。過了清明節。脆滑鶯兒聲不歇。池塘淡淡霏香雪。好倩吳儂翻一闋。宮錦氍毹。顧影神清絕。銀燭光消銀箭徹。一鉤斜挂城邊月。

羨門曰。意言新警。張山來曰。生香真色人難學。



又看演祭皋陶劇。  
仍用前韻。

水面綾紋堆亂纈。一曲清商。寫出清流節。枉矢離離光未歇。若盧閉處飛霜雪。  
呵壁左徒聲乍闕。南北甘陵。鴻影冥冥絕。尺霧消來天問徹。一鞭好弄山間月。

又送荔裳入蜀。  
再用前韻。

濯錦江頭濤作纈。萬里蠶叢。重建相如節。渝唱巴童渾未歇。一簾曉映峨眉雪。  
紅溼海棠歌正闕。帽影鞭絲。點染三川絕。散髮瞿塘清欲徹。半輪流送平羌月。

其年曰：峽月巴船。清輝如見。武曾曰：讀此但覺山川斌媚。何須作蜀道難耶。始信青蓮故是比體。山來曰：非是山川斌媚。乃是先生筆墨斌媚耳。

又送沈郎。再用前韻。

滿路丹榴明似纈。蜀道羊腸。細馬隨旌節。花重錦官香未歇。倚欄閒看峨眉雪。

記得梁園歌一闋，貼地腰身。四座顛狂絕。嫩綠池塘清影徹。依稀照見人如月。

羨門曰：何其清綺。新書樵曰：花重二語耐看。嫩綠二語耐思。

又題龔半千畫。

石骨嶙峋驚拔地。千尺藤蘿。盤壁蛟龍勢。茅屋半間風打碎。箇中應有幽人睡。門外片塵飛不起。嫩綠新蒲。杳靄江湖意。偷許移家來畫裏。一塵請隸無懷氏。

羨門曰：瀟灑出塵。阮亭曰：字字飛動紙上。其年曰：茅屋二語。詩中孟六。山來曰：我亦欲移家畫裏。

又題王宓草畫螭。

筆帶煙霞人晉魏。搗得滕王。海眼圖中意。惆悵東風吹不起。翩翩只在生綃裏。夜雨攪林花瓣碎。覓蕊爲糧。還抱花鬚睡。春色滿園拖粉翅。不知夢見莊周。

未。

羨門曰·寫生妙手·阮亭曰·跌宕風流·才子之筆·其年曰·輕盈婉約·  
畫態極妍·書樵曰·夜雨三句·較唐人樹頭蜂抱花鬚落·更爲細膩·

又夏夜酒醒·  
口占·

解識濁醪多妙理。八尺琉璃引入甜鄉裏。酒重燈昏慵不起。夢回已是三千里。  
殘月幾樵斜界紙。天色空青銀漢光垂地。苔澀流螢飛且止。穿簾好趁荷風  
細。

鳳于曰·夢中記里·  
煞是無聊·

又修來席上詠  
秋海棠·

涼月娟娟流影細。道是秋花。却帶春花字。何限嬌紅思婦淚。玉壺亂滴珍珠碎。  
籬畔幾枝纔放蕊。任是春花。不比秋花媚。簪向箇人鬢鬢髻。晚霞一點明於  
洗。

羨門曰：裴回宛轉，自成文章。武曾曰：有色無香，此花恨事。讀簪向人箇二語，饒有香在。山來曰：予曾和先生此詞，真有珠玉在前之媿。

又讀六一集十二月鼓子詞，嫌其過於富麗，吾輩爲之，正不妨作酸餽語耳。閒中試筆，卽以故鄉風物譜之。

正月春盤初獻歲，帽影鞭絲，羅拜人如市。爆竹一聲煙霧起，幾枝紅燭消燈事。記得少年扶半醉，襜褕衝塵，評話開明寺。三十年來風景異，似看洛下伽藍記。

二月花明鄰上已，柳學鵝兒，桃學紅粧媚。布穀勸耕聲未已，腥風海上來魚市。經濟山林渾不易，種杏條桑，多少閒心事。金馬鳳池春夢耳，竹籬茅舍原如此。

三月桐華鶯哺子，百轉聲中，一串驪珠碎。過了清明無意思，鞦韆還挂垂楊裏。牆下櫻桃纔謝蕊，題題珊瑚，已浸饞牙齒。萬紫千紅同逝水，幾翻風雨春歸矣。

四月東皋樓下水，入網河魚竟尺鮮無比。煮酒遙沾青杏意，牡丹大似姚家第。  
一夜籊聲來屋底，滿眼新篁帶粉拖香氣。絡罷縑車蠶下子，一年村女渾無事。

五月黃雲全覆地，打麥場中咿軋聲齊起。野老謳歌天籟耳，那能略辨宮商字。  
屋角槐陰耽美睡，夢到華胥蝴蝶翩翩矣。客至夕陽留薄醉，冷淘飴餈餽窮家計。

六月溪堂風細細，課雨占晴略帶農夫意。雲脚倒垂龍掉尾，汶河已上黏天水。  
素柰抹紅三道未帶露，繁枝老子生歡喜。瓜是綠沉朱是李，敲冰不羨長安市。

阮亭曰：亦復工絕。非但豪邁。山來曰：農圃風味。時物變遷。天然生趣。點染無窮。

七月西疇禾稻美，翠色沾衣香比春花細。乞巧聊供兒女戲，衰翁厭說填橋事。

細雨連宵偏入耳。颯颯秋聲。苔影生涼意。回首江南鱸作市。扁舟愛殺天隨子。

八月長空飛鴈字。芋栗全登。消受田家味。晒棗堂前紅滿地。何須苦憶南天荔。蟾兔秋毫輝萬里。玉宇瓊樓。人抱清光睡。蕉葉翻翻斜界紙。草蟲慣作嚶嚶技。

九月涼風蘋末起。落帽登高。一殼雙螯美。楓老當門圍薜荔。年豐豈懼催租吏。白酒黃雞滋味異。老瓦盆中。牧豎堪同醉。風雨攪林渾不寐。挑燈起作秋聲記。

阮亭曰：不怕租吏亦大奇事。恐是姑妄言之耳。  
山來曰：讀風雨一句。不須更讀秋聲記矣。

十月寒雲陰匝地。草淺霜濃。獵騎蕭蕭意。老去垂楊生左臂。鼻端出火翻成愧。梢柹爐紅堪自慰。絕勝年年。風雪金門轡。日出黃綿還炙背。杞人不下憂天。

淚。

十一月狂飈驚晚歲。一線陽回。家慶逢南至。覓果堂前成往事。兒孫滿眼當年似。一夜仙人紛玉戲。三尺瑤華。粧點天容醉。鹽撒空中差可擬。未如柳絮因風起。

阮亭曰：末十四字：全用成語·奇妙·孫仲愚曰：用古之妙·直參化工·其年曰：稼軒用晉帖語入詞·猶未若珂雪之入化也·

十二月簷冰如列齒。檢點流光。又逐修鱗逝。屈指明朝二十四。一年好事應無幾。鬱壘桃符忙底事。綵勝銀旛。分付兒童記。夜火松枝還燼歲。五更不策朝天騎。

阮亭曰：十二首瀾漓頓挫·公孫大娘舞渾脫手段·乃於行墨遇之·修來曰：幽雅遺音·鳳子曰：以田家行樂·點染歲華·覺本地風光絕勝·

漁家傲秋感

燕市秋來風色改。山圍碧玉清涼界。屈指津門多紫蟹。街頭賣。天生左手持螯

在。不信濁醪澆磊塊。醉鄉更比人間隘。月落屋梁憎老態。渾無賴。蟲聲四壁愁如海。

羨門曰。酒德頌可以不作。

又讀漢史。

縹緲雲中赤彘子。求仙遠隔蓬萊水。巨棗安期曾餉未。真奇事。馬肝一片文成死。天下神仙皆妄耳。茂陵石馬秋風裏。金椀玉魚紛出市。渾無味。如鉛早下銅人淚。

阮亭曰。實菴此等詞。今作者中惟其年能之。其年曰。如王先生言。僕何敢當。正如昔人所言。春水將生。孤鶩速去耳。武曾曰。是史公封禪書本旨。鳳子曰。絕似通天臺表。颯颯逼人。

蘇幕遮

閩冬

塞雲橫。關月遠。簾外霜濃。寒重呵金剪。手擗綠橙香霧濺。繡被兜羅。只許獶兒



件。參旗斜。銀漢淺。好夢依稀。又被風吹斷。離思乍隨清漏滿。倦眼窺牕。蟬影垂垂亂。

美門曰：妙於吹夢無蹤。阮亭曰：珂雪詞。骯髒多而媚少。此等絕有周柳風味。

添字漁家傲六月

六月南牕無暑氣。幾點流螢。偏照青苔地。搖曳慣乘絲雨細。翩然起。隨風又到簾櫳裏。紈扇撲來紛欲避。似滅還明。驚入蓮花蕊。露冷昔耶鴛瓦膩。依稀是。摩訶池畔涼如此。

阮亭曰：昔最喜美門秋牕無火。暗螢相照之句。以爲文外獨絕。實菴正復不滅。其年曰：末語推開一筆。正所謂離鉤三寸法也。

又初秋鄉思

急雨攜將秋色至。門掩西風。早是愁滋味。漠漠溼雲千樹裏。偏垂地。晚山一點煙螺髻。茉莉宵涼還放蕊。穿瓦螢飛。隱壁蟲聲細。歸夢亂如春絮起。書空寄。

迢迢銀漢人千里。

阮亭曰：已近秦李。此是當行本色。

又賦得手提金縷鞋。

一樹木蘭花影大。露溼銅鋪。不閉歲鞋鎖。半夜出來驚欲躲。君王過。澄心堂側。藏鐙火。響屨迴廊知未可。似水香階。那受青苔澆。半晌假人魂乍妥。嬌無那。匆匆難唱家山破。

其年曰：勝讀梅村先生秣陵春樂府。

青玉案

鴈字。

數行界破青天色。似一幅。荆關筆。楓葉蘆花秋瑟瑟。問君何事。書空難盡。影落瀟湘碧。人間多少傷心客。欲寄離愁那能得。折勢分明成乙乙。無端風雨。橫斜催亂。幾陣煙雲黑。

其年曰：筆陣駿駟。山來曰：詠雁字詩極夥。無如此詞不卽不離之妙。

江城子

冬日偶興

千門霽色日曛曛。暖融融。似春濃。只少桃花扇底一襟風。忽憶平原淺草地。追狡兔。控雕弓。呼鷹直上最高峰。氣如虹。馬如龍。遙望一天毛血灑晴空。罷獵歸來何處去。殘雪路。灞陵東。

羨門曰：腦後風。鼻端火。當是爾時語。鳳于曰：坡老擎蒼牽黃。興致略同。

又戲作

貧家今日聚多錢。是荷錢。是苔錢。怪底三春常費買花錢。亂撒東風渾欲盡。留不住。似榆錢。紛紛人世競青錢。拔釘錢。捋鬚錢。絕勝嗷嗷九府一文錢。昨夜鄰家喧社鼓。頻吹落。紙黃錢。

武曾曰：喚作阿堵。那得不算解人。山來曰：此詞亦萬選萬中。

風入松七夕戲作

明河低轉恰西東。良夜方中。鵲橋欲駕鸞輪起。盼雙星、輾轉愁儂。只恐金支翠節難勝鬢霧鬟風。樓頭乞巧定誰工。女伴匆匆。露華如水天如洗。最淒涼、銀井高桐。月照紗幮無那。黃姑夢裏相逢。

羨門曰：政如君家繡虎。亦復有獨處瓠瓜之感。山來曰：謙父翻案。其詞達。先生游戲。其情深。

越溪春郭外用宋人韻

草軟沙平何處路。郭外卽天涯。板橋流水傷心地。帶夕陽、點點明霞。歌哭聲中。紙錢灰裏。知是誰家。參差油壁香車。燕尾隔牕紗。歸來三盞兩盞淡酒。黃昏鴉亂風斜。只有短檠如舊。依依爲照寒花。

羨門曰：詩情畫意。

御街行和阮亭贈鴈

寒蕪極目連三楚。鴈陣驚相語。一聲長笛出高樓。渺渺斷雲天暮。江深月黑。霜寒人靜。獨自啣蘆去。遙峰恰是衡陽數。寂寞瀟湘雨。無端孤客最先聞。嘹唳亂帆南浦。隻影橫空。相逢何處。紅蓼洲邊路。

羨門曰：江深月黑。霜寒人靜。八字中如聞嘹唳。阮亭曰：君從何處省得此無人態。

祝英臺近

賦得更脫紅裙裹鴨兒。

浦風回。村路遠。畫檝弄還倦。閒唼浮萍。乳鴨兩三點。任他次第呼名。竹弓休射。怕驚起、睡鴛波面。繡裙茜。忽地蘸水空明。花影碎。凌亂猶帶殘霞。混入也難辨。笑攜女伴歸來。滿身荷露。渾疑是、巫山行徧。

其年曰：渲染處。如北宋人畫。

又

稼木

玉瓏鬆。冰纖軟。撲面柳花亂。滿目琳瑯。疑向畫中看。非關青女初來。天風微送。

任月地、雲階都遍。莫吹散、掩映三尺瑤華。弄影倍輕倩。片片空濛。銀海也生眩。誰搏圓璧方珪。零珠斷粉。是碧落、天孫偷剪。

一叢花並蒂蓮

碧幢翠蓋舞風輕。照水兩亭亭。金塘好暖。鴛鴦睡。孤飛下。宿鷺還驚。漢殿雙棲。江東並嫁。一樣曉粧明。更疑人。傍楚皋行。解珮悄無聲。紅衣對拂光凌亂。平分取、玉露金莖。臂是同彎。心憐共苦。絲引暗愁生。

柳初新寄懷高舜木

當年快作春燈聚。曾踏徧、磚街雨。帝子高臺。將軍法曲。彈指舊遊如霧。見說烏衣儔侶。未消磨、平生豪舉。脆管哀絲頻度。入新聲、香奩詞賦。午橋魚鳥。平泉樹石。都是泥人情處。待跨箇、青驢歸去。與君上、雲門山路。

瓜茉莉本意。和蛟門。用宗梅岑韻。

玉蕊離離。只飛瓊可比。添多少。晚牕清氣。風前小立。微嗅處。詭人嬌意。黃昏後、  
雨過新涼。金蟲簪兒串起。新粧鬢鬢。紗幮旁。鵝鬢底。窺斜月。花光流墜。餘香  
幽約。收來枕畔合子。待明朝。淡抹遠山相對。碧天澄澄似水。

羨門曰：詠物詩詞。貴在取意不取象。寫神不寫形。如此結語。妙在形象之表。  
其年曰：後段四十二字。無一字說茉莉。却無一字不是茉莉。正詞家三昧也。羨門言  
是。武曾曰：溫柔  
一片。春夢無痕。

簇水

玉蝶  
梅

雲母堆成。并刀剪破。滕王譜。幾雙粉翅。化玉蕊。瓏鬆千樹。行遍瑤臺十二。還向  
孤峰住。怕雪擁。斷橋來路。吟思苦。便一夜。牕前忽到。在屋角。昏黃處。濃香作  
陣。更莫引蜂兒舞。悵悵曉風吹亂。好夢參差去。闌干曲。倩淡煙低護。

喝馬一枝花

送沈茶星之  
來賓任

絕遠賓江路。亂水輕舟頻渡。瀟湘行欲盡。瘴雲苦。千樹桃榔。月黑鷓啼處。到日

清秋好。蟹戶鮫人。滿城看笑舞。椰子傾甘露。照眼紅蕉初吐。推琴小柱。笏認  
庭暮。龍目香中。早暗送年華去。吟情應不減。問寫就蠻牋。重寄昭王臺否。

惜紅衣

詠荷花  
紫草

影借氍毹。根連阡陌。都無人惜。翠蓋紅衣。佳名倩誰錫。盈盈帶露。剗襪過茜裙  
留躡春碧。行盡斷蕪。怕王孫岑寂。斜陽弄赤。山抹煙光。丁香也無色。幾番風  
信。曾否記開日。莫是雲英潛化。滿地亂瓊狼籍。惹牧童驚問。蜀錦甚時鋪得。

滿江紅

德水道  
中

滿目淒其。又早是、亭皋葉下。憶當日、披裘過此。六花飛灑。秋水一灣波。寫鴈青  
煙幾點。星分野。問長驅、下澤爾何人。悠悠者。荒林畔。寒鴉話。老柳上。漁罾挂。  
更濃煙衰草。迷離堪畫。客路驚看沙似雪。奚奴慣使車如馬。向玉河、冰底聽流  
澌。歸來也。



羨門曰：超妙至此。要使辛劉頹首。  
書樵曰：空闊高蒼。語語堪畫。

又題吳遠度竹  
村情話圖。

滿目蒼然似嶰谷。琅玕千尺。想落筆、公孫舞劍。張顛濡墨。瀟灑青天鸞鳳下。動  
搖雷雨蛟龍黑。掩柴門、清話爾何人。情金石。草閣外、江流積。小艇上、孤蓬窄。  
喜青罇可共。閑愁如滌。風起牕前聞解籜。月明林下堪容屐。憶當年、幽事幾人  
同。山陽笛。

羨門曰：鸞鳳一際。亦自有蔽日干霄之況。結語慷慨悲涼。可抵  
子期感舊。修來曰：常語都有奇氣。其年曰：是竹林中人語。

又金臺懷  
古。

落照蒼然空掩映。荒臺數尺。憶當日、君臣之際。悲哉昌國。七十二城如解籜。功  
成翻削英雄色。讀先生、一紙報燕書。爲沾臆。碣石畔、風蕭瑟。卽墨下、牛騰擲。  
笑安平奇計。兒童能識。騎劫庸才何足道。可憐戰血凝深碧。問千金、馬骨倩誰

埋邯鄲陌。

羨門曰：不須重弔望諸君矣。其年曰：憑高弔古。自是先生擅場。每遇此等題。不覺耳後生風。鼻端出火。武曾曰：杜陵詩史後又添一詞史。

又題阮亭寓竹。

何物琅玕偏愛傍。子猷書屋。微雨後。月痕低照。亭亭新沐。洛女凌波。鳴雜珮。湘人鼓瑟。敲寒玉。早風雷。一夜起龍孫。森然綠。何處是秦川曲。休更覓。篔簹谷。只閒庭半畝。差堪醫俗。振籜未隨秋寂寞。窺簾似共人幽獨。待他年。玉版好同參。寧爲腹。

羨門曰：如不經人意處。正自邈不可及。山來曰：吾鄉玉版。頗饒佳味。想不負先生此腹矣。

又過滹沱。

鴈齒紅橋。聽橋下。怒濤如箭。作襟帶。長安日近。雪消波暖。納納津門。潮水合。茫茫句注。奔流遠。變桑田。一派古今愁。難消遣。千尺堰。秋風捲。千家哭。秋雲暗。

任歌殘瓠子。陽候驕蹇。夢裏常驚龍氣冷。眼前復見蛟宮淺。倚危欄。塵土上鬚眉。王程緩。

又和錫鬯吳大帝廟下作。

遺廟江東。舊日是。紫髯天下。英魂在。靈風夢雨。捲旗飄瓦。師子雄才原足惜。孝廉斌媚還能霸。笑周郎。帷幄慮偏長。忘中夏。羞銅雀。東風借軍衣白。朦朧駕。彼孫劉之睦。姻盟何假。自惜江山吳子國。於今父老新豐社。聽石頭。戰鼓似寒潮。空城打。

羨門曰：劉賓客如許好詩。對此幾成鱗爪。戰鼓似寒潮。詩家倒裝法也。其年曰：顧盼橫江。英姿颯爽。武曾曰：睥睨悲涼。如聞廣武之嘆。鳳子曰：一結悽其。似漁陽摻。阮亭曰：兩段各有其妙。後段尤工矣。

惜秋華牽牛花。

河鼓星高。繞莓牆幾點。野花開了。不近夕陽。橫斜曉風吹老。依稀過雨長天。誰

脫下柴窰新稿。杯小縱金盤露濃。承來些少。耐肯伴紅蓼。只深描淺畫。把秋容粧好。偷剪碧霞。疑倩七襄人巧。佳期約略填橋。望翠輶。欲來波渺。更悄溼青苔。暗螢相照。

掃花遊

春雪·用宋人韻·

元宵過也。看春色。蕪蕪澹煙平楚。溼雲萬縷。又輕陰作暈。蜂兒亂舞。一夜梅花。暗落西牕似雨。飄搖去。試問逐風。歸到何處。燈事纔幾許。記流水。鈿車畫橋爭路。蘭房列俎。嘆華易擲。鬢絲堆素。擁斷關山。知有離人獨苦。漫凭踪。聽寒城。數聲譙鼓。

阮亭曰·一夜梅花四句·擁斷關山二句·已到高史妙處·風于曰·羣山玉立·與爾共高寒·山來曰·恰好是春雪·妙甚·

露華

題沈鳳于被園·

沈郎學圃。傍罨畫溪邊。點染千樹。十畝綠陰。接葉交柯。憐汝籐梢橘刺。森然飽

幾載江南煙雨。垂垂熟。來禽過時。偷眼啣去。青箬箬笠容與。羨種杏條桑。經濟如許。未老雲卿。東湖暫結幽趣。兒子上樹生狙。早摘下翠盤無數。秋氣冷。蟲聲斷。蛙靜否。

滿庭芳

聞鴈

細草摧霜。寒風敗葉。樓頭一鴈初鳴。偶來嘹唳。何事恰關卿。惆悵沙平月落。衡陽路。幾點峰青。還堪憶。江楓漁火。隻影傍人明。伶俚。山枕上。夢回酒醒。哀韻偏清。更階前蛩語。林外秋聲。同是一般憔悴。算只少。猿叫三更。從今去。湘流曲折。莫近小牕橫。

羨門曰：不辨何聲。但覺腸斷。山來曰：句裏行間。如有雁聲嘹唳。

又和人潼關

太華垂旒。黃河噴雪。咸秦百二重城。危樓千尺。刁斗靜無聲。落日紅旗半捲。秋

風急、牧馬悲鳴。閒憑弔、興亡滿眼。衰草漢諸陵。泥丸封未得。漁陽鞞鼓。響入華清。早平安烽火。不到西京。自古王公設險。終難恃帶礪之形。何年月。剗平斥堠。如掌看春耕。

羨門曰：竟以史家論斷語入詞。橫絕今古。  
書樵曰：出經入史。而無烟火氣。所以爲雅詞。

又和錫鬯李晉王墓作。

石馬無聲。饑鳥作陣。白楊風急。蕭蕭珠襦玉匣。曾此塋人豪。河朔同盟藩鎮。分帶礪。只汝功高。眞樂事。錦囊三矢。意氣快兒曹。銀刀新霸府。十年征戰。兗鄆之郊。奈優伶日月。粉墨親調。惆悵諸陵寒食。青青草麥飯。誰澆豐碑臥。牛羊礪角。壞磴走山樵。

羨門曰：大爲亞兒生色。然亦是定論不刊。阮亭曰：有此見地筆力。可以弔古。其年曰：每讀五代史。至伶官傳。輒爲涕下沾裳也。今于此詞亦然。

水調歌頭 大醉放言。

左手把歡伯，右手擘雙螯。淋漓酒濃衫重，一任髮蕭蕭。我自狂歌潦倒，醉看長安市上，若箇插金貂。鄧禹莫相笑，阮籍正逍遙。列蛾眉，調錦瑟，響雲璈。君侯應自貴耳，吾欲等鷓鴣。腐鼠纔堪一飽，仰視鷓鴣，日嚇意氣二蟲驕。安往非貧賤，三徑問蓬蒿。

羨門曰：以漆園成語入詞，奇絕妙絕。阮亭曰：有此胸情，可免撻壁。其年曰：人言阿龍超，阿龍固自超。山來曰：豪邁曠達。

又喜厚餘至都，率然有贈。

落拓老兄弟，踪跡共沉浮。匆匆神虎分袂，江海幾經秋。多少黃金橫帶，我輩青衫羸馬，散蕩足風流。吾試與君語，富貴定難求。魯陂側，錦秋岸，蜡湖頭。溪山如畫，煙波兩兩釣魚舟。辛苦斜風細雨，消受紫萼紅蓼，冷淡爾爲儔。努力飲醇酒，身世問沙鷗。

武曾曰：磊落蒼茫，襟期可念。山來曰：厚餘先生視工河上，不須更歎青衫羸馬矣。

又為龔節孫題  
種橘園。

玉局昔年客。禿髻老仙翁。思移林屋嘉樹。飽啖洞庭紅。擬作亭名楚頌。眷此素榮綠葉。慘淡比青楓。有志那能遂。遺蹟大江東。仿瞻子。懷古意。畫圖中。雨簑風笠。長鏡白木。苦匆匆。且自耕雲半畝。轉眼霜林千顆。一笑對山童。忘却生綰裏。欲倩右軍封。

又送陳六謙之  
安邑任。

琴鶴渺然去。為政足風流。何意鳳漂鸞泊。百里借君侯。三晉雲山北向。咫尺二陵風雨。納納動離愁。雪片大如手。匹馬過蘆溝。門霜戟。人繡虎。筆銀鈎。禹都吟眺。淋漓墨瀋碧峰頭。試到野狐泉上。入望鹽花似霧。天寶物華收。欲問段干木。舊蹟杳難求。

其年曰。風流豪邁。堂堂復堂堂。  
山來曰。慨當以慷。



又午日·和  
其年·

何處剛蒲去。俛首飲醇醪。長安十度重午。令節又相遭。不是今朝弧矢。不是今  
朝魚腹歌哭。總無聊。雲氣挾雷鼓。疑聽廣陵濤。憶當日。觀競渡。趁江潮。天風  
正怒。彷彿角黍餽饒蛟。憔悴故園心眼。潦倒女兒景物。未足寄吾豪。和汝驚人  
句。土缶與雲璈。

又快  
雨·

白雨響新瓦。火鬣走長天。錢塘萬弩齊射。驚起老龍眠。疑是夔牛鼓震。又恐驅  
山鐸掣。潑墨盪雲煙。咫尺匡廬下。九疊亂鳴泉。飛石燕。笑玉女。捲湘川。錚鏦  
金鐵。洞庭張樂宴羣仙。立掃黃塵樅檝。一洗神皋禾黍。濃翠正娟娟。造物不言  
德。風日弄清妍。

鳳子曰·快哉亭上繪寫·有聲有光·虞  
次安瑞雨頌·盛德形容·當復過之·

天香

詠綠牡丹  
爲牧仲作

國色凝香。露華垂檻。苔痕欲上階砌。不就輕黃。還成嫩碧。接葉交柯無二。石家金谷。供妙舞珠珠濃睡。渲染春光好處。掩映一天空翠。魚子暮雲微起。帶蕉牕幾分涼意。阿誰是眉黛遠峰如此。倒挂嶺南幺鳳。莫藏影花間。覓花蕊。芳草成裊。碧旗碾試。

其年曰：淡池空明。幾于水天一碧。  
武曾曰：寫生妙手。不藉粉本。

又龍涎香

孤嶼荒寒。斷潮嗚咽。抱珠神物濃睡。蜃霧成樓。綃宮噴雪。點點鮫人清淚。紅薇露溼。早釀就都梁佳致。巨舶長風破浪。似帶海山鱗尾。春閨夜闌煙細。鬱空青水。天霞氣漫惹。雨絲霑灑。金猊聲碎。鳳脰一枝深炷。假翠袖餘寒戀。纖指莫放悠颺。繡簾匝地。

其年曰：此錢塘貴主匿中物也。趙家姊妹雖有好香，總不脫人間煙火。武會曰：妙于曲寫龍涎，不然博山爐中百和香，鬱金、蘇合及都梁，與此無與也。

玉簫涼

七夕有感  
和其年

十載長安記如此良宵團扇拋殘。龍梭初罷織，赴碧落幽歡。幾多鈿合蟾子，陳  
瓜果乞巧樓前驚夢醒。但絳河千尺雲氣漫漫。無端嫩苔繡瓦，斜月窺牕。粧  
做秋意闌珊。去年當此際，正同倚危欄。定識涼生玉簫，盼鵲駕不到人間。天似  
水，擲淚珠荷露爭圓。

其年曰：殊有雲  
鬢玉臂之思。

暗香

綠萼  
梅

牆陰淡白算雪晴未久。換成春色。一剪蘼蕪移上枝頭，弄輕碧。照水空明數朶。  
認樹老雨痕交蝕。大好是洛浦相逢，尋翠羽消息。橋側聞夜笛。笑寂寂玉鱗。  
月中難覓。九疑舊客。又向蟠螭露仙蹟。轉眼青青似豆。還記取前身蕭瑟。搖落

處苔影薄，依稀見得。

其年曰：後半闕鉤魂攝魄。姜白石不能擅美于前矣。  
山來曰：是爲綠萼傳神，與泛詠梅花迥別。

留客住鷓鴣。

瘴雲苦徧五溪沙，明水碧，聲聲不斷。只勸行人休去，行人今古如織。正復何事，關卿頰寄語，空祠廢驛，便征衫溼盡，馬蹄難駐。風更雨，一髮中原，杳無望處。萬里炎荒，遮莫推殘毛羽。記否越王春殿，宮女如花，祇今惟剩汝。子規聲續，想江深月黑，低風臣甫。

水晶簾

賦得無端嫁得金龜婿，  
辜負香衾待早朝。

夢細幽香靚，甚長樂鐘聲敲醒。倦眼迷離，訝寶炬星輝，照人難定。正好睡時，何處去，想蓮漏迢迢，尙永五更天，最是霜寒，鎮教寂靜。徘徊掩清鏡，憶紅闈深夜，鄰鷄曾聽。便惱他，啾啾未愁伶俜，不似而今慵早起。怕瑟瑟，箠殘被冷，又爭

如簾幙長垂。小牕日影。

其年曰于題  
意極爲體貼。

尾犯 筓。

小牕雨霽。傍疏籬一帶。籜聲盈耳。繩牀乍破。幽人夢。驗苔錢穿碎。墻陰屋角。鬱  
千尺。凌雲勢。笑洋州太守清貧。却饒玉版風致。曾過荻洲江市。銀鱗撥刺出  
水。向柁樓晨飯。松溼煙青。燒來偏脆。谷口如蓬。宮中似束。故人情味。最憐是。憔悴  
龍孫。琅玕銷盡生翠。

燕山亭 九日排  
悶。

北鴈橫斜。似水晴空。無限蕭蕭意。深巷閉門。懶去登高。那問幾人曾醉。紅葉青  
山。正渲染蒼涼天氣。何事。只辜負秋光。淡然如此。記得去歲城南。傍野逕疎  
籬。亂穿濃翠。女兒景物。羈客心情。添得一番悲喜。便上層樓。望不到故園千里。

千里有多少荒煙敗壘。

孤鸞

送陸蓋思歸武林時  
新有悼亡之感。

新秋天氣正。河鼓星高。牽牛花媚。禾黍西風。驢背一鞭遙指。有人巢青閣上。倚危欄望窮煙水。那識猿啼鷓鴣唱。早斷魂千里。憶去年瓜果閒庭裏。看兒女燈前乞巧。懽意螢火斜飛處。午夜涼于洗。而今歸來索寞。最無慟。黃昏牕底鸞鏡。輕塵莫掃。剩盈盈清淚。

雙雙燕

見燕子營  
巢有感。

舊年社日。向聚燕臺邊。送君歸去。杏花開罷。遲日園林春暮。又栩栩梁間住。聽一片呢喃相訴。不嫌傲舍荒涼。來伴京塵淒楚。柳絮池塘何處。看玉剪交飛。亂衝花雨。主人謝客。辛苦舊巢將護。莫待新雛成羽。更去。傍紅樓朱戶。且自掠水脚泥。睡足一庭香霧。

阮亭曰：竹屋梅溪·夢窗白石·四家之間·可置一座·其年曰·莫待新雛二語·殊深言外之感·武曾曰·去傍紅樓朱戶·較飛入尋常百姓家傷心十倍·

又詠鏡中美人影·  
和沈鳳于·

一泓秋水誰移向深閨·偷近蛾綠·空明不定·綽約伴人幽獨·臨就崔徽別幅·又  
淺笑輕顰相矚·何人解識傾城·自賞容輝金屋·掠削雲鬟粧束·問就裏芳心·  
可同千曲·離魂初覺·嬌暈枕痕紅足·小閣朝來新沐·瞥收却巫峯六六·怕是清  
冷圓冰·一擲黃金難贖·

金菊對芙蓉

和錫鬯蝶碾  
弔孫夫人·

蜀國夫人·孫郎小妹·腰間龍雀刀環·歎東南人物·弱女登壇·錦帆搖曳·江如練·  
望瞿塘道路漫漫·永安龍去·蚕叢夢杳·紅粉凋殘·靈澤遺廟·江干有雲·車風  
馬·霧鬢煙鬟·悵西風·白帝鸞·馭難還·千尋鐵鎖銷沉後·家何在·兩地·悲酸·千帆  
落照·漁歌唱晚·露白楓丹·

美門曰：羽聲慷慨之中，仍自粉心香口。其年曰：英雄兒女，慨當以慷，如見高涼洗氏月明錦繡也。宋旣庭曰：女子英雄，得曹公彩筆憑弔，幾令二喬無色。鳳子曰：憑弔精靈，足令漢苑吳宮，同悲離黍。

月華清

詠山鷓，爲阮亭作。

織翠爲裳，凝丹作距，飛來何處煙暝。金索珊珊，落下碧梧銀井。憶蜀國待詔圖中，共棘雀山花相映。難定。試洗却濃妝，雪衣嫌影。挂向玉堂深處，莫百轉輶輶，惱人幽靚。夢結梨雲，怕是數聲驚醒。若覓句負手巡檐，更攤書茶清香冷。風靜。好低徊一曲，伴他寒磬。

其年曰：冷香幽翠，烘染絕倫。山來曰：是一幅絕妙着色翎毛。

催雪

珍珠蘭。

媿媿牽風，溥溥帶露，窈窕最宜深院。恰閩海移來，龍宮幾串。金谷墮樓姝麗，伴杜若江蘼分嬌面。鮫人淚滴，紫莖蘋甲，都教開遍。開遍含笑盼，任徑寸蚌胎。



讓他香倩。羨瑟瑟輕圓。涼颺吹顫。莫向池塘顧影。怕瀉入紅蕖。尋難見。正髮鬢  
粧晚。珠娘頭上。一枝微綻。

又紅梅

夕雨凝丹。曉晴着樹。兜眼小籬如繡。喜照眼偏明。數枝窺牖。只恐春寒微重。費  
幾許燕支勻紅。綉峯迴路轉。紛紛開落。武陵近否。清瘦。頽玉鏤。看一片迷離。  
斷霞鋪就。甚眞色。苧蘿。縞衣非舊。好伴吳娘記曲。碎顫顫珊瑚。盈懷袖。嘆隴首  
萬點風飄。冷落絳綃時候。

月下笛

悼何蕤音

官閣明燈。珠簾覆屋。雨中深酌。茶煙綽約。簷花聲在簾箔。酒人已逐浮雲散。轉  
眼叫秋猿夜鶴。想鴛鴦湖畫舸。一天絲管。更誰行樂。思着中情惡。記威鳳文章。  
神羊頭角。龍賓揮霍。漏痕還帶釵脚。原邊宿草年年綠。有多少西州淚落。斷魂

處隔江南苦竹黃蘆寂寞。

玲瓏四犯

送杞園遊西湖

三月吳山記。梅子黃時。幾多煙雨。載酒西冷。千頃嫩荷澄暑。沉醉失却湖光。似夢裏斷雲飛絮。嘆軟塵十載。遮留翻送故人遊去。一枝柔櫓穿花路。淡空明箇儂眉嫵。檀欒金碧天然麗。都在晚霞紅處。試問堤畔垂楊。尙否青青如故。遇禪燈老衲。還爲我殷勤語。

鎖牕寒倭。

巨舶巍峨。寒潮寂寞。颶風吹暝。鸞膠鬼斧。製自海山人境。鬱金沙屑來粒粒。明霞猶帶歐羅勝。想龍涎潛貯。冰綃偷捲。迷離交映。光靚伴清鏡。試摩挲小簇。玉纖留證。宮鴉一色。拖逗麗華雲影。憶當年連弩射魚。浩蕩煙波歸未肯。更誰攜綵扇。昆刀泛蓬壺月冷。

又卽事。

銀鴨香銷。湘篝獸冷。夜長生倦。寒梅未放。勒住春痕一線。聽驚沙飛鳴陣陣。颯然似入關山怨。想參旂半落。明河斜挂。霜風如剪。思遠情何限。縱文鴛交扣。繡衾爭戀。迢迢玉漏。海水注來難滿。還夢他旅夢乍回。屈曲銅鋪門靜掩。更誰圍雪作猗兒。映小牕人面。

又爲梁大司農悼亡。

苔溼春蕪。蛛縈繡幕。悄無人影。玉釵斷後。曲曲畫闌誰凭。怕紅絲繫來雙燕。呢喃還向珠簾等。縱寶衣施盡。縷金裙在。淚花猶剩。厮映。生悲哽。記皂箴煎成。鸞膠未冷。彩雲一片。又苦斜風吹暝。步瑤臺姊妹肩隨。茫茫那知長夜永。問何時環珮珊珊。飛下蓬萊頂。

風子曰：迷離哀怨。山來曰：淒惋悲切。哀而不傷。○等字妙押。

百字令史詠

海門一點。駕素車白馬。怒潮來去。回首蘇臺金虎氣。斷送幾場歌舞。鄢郢家門。荆蠻帶礪。兩地應難補。英魂猶在。空餘血淚凝注。五千甲楯行成。十年生聚。軋軋勾章。吳越興亡。關底事。都作寒江煙霧。入楚旌旗。盟齊歲月。寂寞渾無據。蘆中人杳。區區恩怨何苦。

阮亭曰。起句英靈颯然。如見穿山脇挾文種時也。武會曰。逝水興亡。閒中憑弔。只百字寫來。可當一編越絕。鳳子曰。每嘆吳越興亡。全賴左國越絕諸篇。留人慨想。不然戰國六雄。與漢陽諸姬同盡耳。得此自足千古。

又

田光老矣。笑燕丹賓客。都無人物。馬角烏頭千載恨。匕首匣中如雪。落日蒼涼。羽聲慷慨。壯士衝寇髮。咄哉孺子。武陽色怒而白。試問擊筑漸離。此時安在。何不同車發。負劍祖龍驚掣袖。六尺屏風堪越。貫日長虹。繞身銅柱。天意留秦。

劫蕭蕭易水。至今猶爲嗚咽。

阮亭曰：此首尤逼幼安。神氣俱肖。南渡二劉。絕脰未必到此。其年  
曰：沉着頓挫。必傳必傳。山來曰：無限感慨。恍聞當日變徵之聲。

又

南山歸晚。遭相詞醉尉。灞亭秋暮。故李將軍猿臂在。射石猶能飲羽。虎鼠行藏。  
煙雲變態。若輩爭知否。霜寒草短。且尋田舍歸去。回首百戰功名。北平上郡。  
歷歷風沙苦。屈指封侯諸校尉。意氣寧堪儔伍。白髮宮娃。青衫羈客。老淚同今  
古。掀髯一笑。塵埃野馬看取。

阮亭曰：衛霍天幸。李廣數奇。太史公於此三致意焉。然後人謂讀衛霍傳不值一錢。  
讀李將軍傳英風如在。二者將何居耶。武曾曰：有草枯鷹眼。雪盡馬蹄之概。

又

出師二表。與殷盤周誥。同銘金石。臣本不求聞達者。爲許先君破賊。瘴雨蠻江。  
秋風渭水。上將揮神筆。落星如斗。熒熒火井將熄。今日丞相祠堂。黃鸝碧草。

俯仰悲陳迹。八陣圖邊。波浪湧。似恨譙周鬻國。一片降旛。千尋鐵鎖。鼎足三分失。先生已矣。何能親見銜璧。

阮亭曰。有才如此。可謂筆補造化。天無功矣。不能名其所以。直須五體投地耳。其年曰。拔地倚天。鯨吞鰲掣。鳳子曰。森沉閃爍。亦詞中臥龍也。古人詩文堪頡頏者。其昌黎之平淮西。山谷之題浯溪乎。山來曰。鳳于評是。

又

三臺鼎峙。俯清漳如帶。東流淒切。數載譙南泥水路。射獵讀書人傑。橫槊悲歌。臨江灑酒。一片雄心熱。二喬何在。東風吹浪成雪。更憶繡虎蜚聲。陳思才調。舞蔗中郎絕。縹緲西園飛蓋處。賓客應劉心折。吳蜀君臣。魏家父子。人物皆英發。何哉青史。世龍猶自羞說。

羨門曰。稼軒詞雅健雄深太史公。吾欲爲此詞移贈。阮亭曰。兩段結束皆妙境。似有神助。其年曰。置此等詞于龍門列傳。杜陵歌行間。誰曰不如。彼以填詞爲小技者。皆下士蒼蠅聲耳。

又張先生席上  
詠鸚鵡杯。

濁醪妙理向水晶宮裏。搜羅杯罍。海氣冥濛光不定。逗漏通明一罇。織水爲衣。流波似羽。鸚鵡佳名也。畫堂捧出。隴頭嬈嬈飛下。盛來琥珀香濃。鵝兒黃嫩。浸明珠無價。想見蜃樓歌舞處。玉乳瑤漿自瀉。風雪撩天。金貂滿眼。我是悠悠者。莫辭一醉。簾櫳嬌鳥相罵。

羨門曰：風雪數語，妙在題外題中。倘恍迷離，不可思議。阮亭曰：鸚鵡螺，歐公曩以長歌擅場，實庵此詞，幾欲方駕。

又天龍寺高歌避暑  
宮遺址。和錫鬯。

蒼苔古瓦。是人天法界。雪山深處。燕麥兔葵荒草地。人道高王曾住。水殿風涼。瑤臺露白。院靜渾無暑。流螢閃閃。宮牆飛入無數。遙想渭水邛山。東西蠻觸。五技窮鼯鼠。勅勒老公歌慷慨。早見英雄黃土。馬稍功名。人龍意氣。總逐西風去。繁華銷歇。紈然朝暮鐘鼓。

阮亭曰：與錫鬯是一勁對。  
其年曰：章法極似老杜哀江頭。

又朱錫鬯過訪不值。  
悵然有寄。

春風吹面又匆匆過了。傳柑佳節。羸馬敝裘何處去。一刺懷中磨滅。日跳如丸。  
臣飢似朔。那得名心熱。思君一話。瞥然鴻爪留雪。記得昨夕燈前。流連蕃錦。  
錫鬯詞名。無縫仙衣接。白石小山門。逕在天半。峨眉幽絕。火樹連宵。歌鐘匝地。奪我  
冰腸潔。因風寄與。重來同醉煙月。

羨門曰：含  
毫邈然。

又中秋和其年。  
時甫過地震。

晚霞成暈似非煙。籠就霓裳僊闕。只恐清光明作鏡。照見鬢眉愁絕。靜掩珠簾。  
輕遮團扇。蜃霧樓臺結。憑誰吹散。玉簫聲細如髮。况是一陣罡風。須彌芥子。  
偶現空花劫。八柱蛟龍。還掉尾。穆穆金波無缺。動魄驚心。十年兩度。錯過中秋。



節餘生瓦礫。他時月底重說。

其年曰·老筆紛披·山來曰·可與東坡水調歌頭一闕·韻頗千古·

又庚申閏中秋·  
和其年·

月如無恨。便清輝萬古。長圓難缺。昔我來思。渾不記瓜果中庭重設。  
余生甲戌·是年亦閏八

月· 身世斜陽。悲歡逝水。鬢有星星髮。驚聞人語。今年兩度佳節。却憶去歲

中秋。輕雲薄露。黯黯芙蓉闕。造物多情還補得。潑眼明蟾奇絕。再舞霓裳平分

桂影。疑對千峰雪。重陽遲了。幾行白鴈能說。

又閏八月壽  
阮亭·

銀蟾的皜。記何時此月。重啓珠宮。羽葆虬幢。紛去住。石塵飛下天中。四十七年。匆匆過却。回首憶生崧。仙家晝永。雕弧今日初逢。等到人歷花磚。文登金鏡。乃許醉顏紅。李杜詩篇聞帝語。莫筴纔發銅龍。縹緲蓬山。從容赤舄。幾見柱輪

珂雪詞 卷上

同他年佳話，依然玉露秋風。

# 珂雪詞卷下

解語花詠水仙·同  
家弟作·

鏤冰作面剪雪爲衣。溪畔盈盈女。幽懷誰許。相逢處。翠袖低垂不語。淡黃眉嫵。聽子夜歌殘白紵。更難兼並蒂連枝。姊妹還同侶。因念雲迷洛浦。自陳王去後。離別酸楚。明珠翠羽。相遲誤。脉脉此情塵土。花魂無主。抵多少小牕微雨。願年年月白風清。仗東君留取。

羨門曰·後段曲傳水仙之神·幾於化工在手·近人詩瑤臺夜冷黃冠溼·小洞秋深玉佩涼·徒形似耳·阮亭曰·極似延露佳作·宜羨門之歎絕也·其年曰·脉脉益益·幾于凌波·微步矣·

又和人詠驪  
山溫泉·

蜃蒸作霧地湧成珠。一水溶溶貯。炎涼誰主。大千界。只有清流可語。乾坤奧府。

是天地恩波凝注。閱從來蕭索繁華。多少傷心處。記否。長生雨露。乘春風靈液。蕩瀟容與。霓裳妙舞。驚魂散。鐵騎漁陽鼙鼓。石蓮如許。想舊日魚龍無數。悵華清一帶靡蕪。任撫今弔古。

羨門曰：天地恩波凝注。勝於此中涵聖澤。悵華清一帶靡蕪。勝於竹樹陰陰碧殿寒。世有賞音。當不以僕爲阿好。其年曰：華清殿後。繡嶺宮前。滿目興亡。沉吟不少。如讀汾水秋風之曲。不得不呼李嶠真才子也。書樵曰：前半雄渾。後半蒼涼。各極其致。

又詠美人花間影。  
和鳳子。

伯勞偷喚。纔理晨粧。小立東風徑。綠陰深靚。苔痕溼。羅襪一鈎清冷。遲迴不定。喜蝶粉花光相映。生憎他倒暈明霞。漏洩驚鴻影。百裯繡裙。厮稱似天風吹墮。露桃仙井。冶遊暗省。銷凝處。怕惹離魂難靜。流輝耿耿。任撲蔌亂紅飛暝。帶滿身香氣歸來。向枕邊猶剩。

渡江雲

送蔣京少下第遊楚。步其年韻。

對西風一笑。碧雲黃葉。悵悵舊霜毫。珠投仍按劍。悔殺平生。未譜鬱輪袍。雪花似翼。桑乾路。寒色刁騷。任紛紛。黃金白壁。意氣屬吾曹。帆搖女兒浦口。新婦磯邊。看江天影倒。問六朝。艤艫鐵鎖。盡逐洪濤。蘆聲瑟瑟。鷓鴣絃急。伴漁火酒醒。無聊。湘岸闊。回頭咫尺青霄。

又欲雪。

溼雲黏似絮。關山凍合。風色偃貂裘。玉樓寒起粟。知是僊人。咫尺駕銀虬。黃昏漠漠。牕影黑。思掛簾鉤。誰剪碎。明河冰水。一夜下皇州。還愁。孟婆潦倒。滕六商量。怕梅花孤瘦。又化作輕煙薄霧。繚繞枝頭。五更錯認。虛生白。最分明。碧落清幽。成獨笑。飛瓊畢竟遲留。

其年曰。結語傲脫。山來。曰。句句是欲雪。妙甚。

珍珠簾

爲牧仲題  
楓香詞。

烏絲閒寫柔情句。吟紅豆才子梁園新賦。高調和人稀。似引商荆楚。憶佩雙鞮。  
隨豹尾。諳出塞淒風零雨。辛苦。早中年易感。鬢絲添素。又向粉署爲郎。聽薰  
香侍史。鵝笙曲度。動魄復驚心。耿一天星露。江上青楓聞鐵撥。抵多少海飛山  
怒。休訴倩岑牟狂客。搥殘羯鼓。

武曾曰。跌宕纏綿。三復此詞。並覺楓香  
佳句可挹。鳳于曰。絕似惜香樂府。

又賦得水品簾  
下看梳頭。

雕房幾曲桐陰裏。金塘側第一傾城姝麗。髮髻照人明。學遠山螺髻。蟬影花光  
相撩亂。襯一片芭蕉濃翠。清綺更珊珊。犀押冷波橫地。疑是月底初逢。被冰  
輪掩映。織綃情思。宛轉翫瓊顏。倩曉風吹起。人在銀河清淺處。倚白玉欄杆如  
水。心醉。想道慵書把。幽懷旖旎。

其年曰。玉殿瑤臺。一清如水。  
山來曰。清綺二字。可移以贈此詞。

木蘭花慢

送孫開盛假歸  
用稼軒韻。

桑乾河畔路。沙似雪。是還非。想杖策從軍。頻年轉戰。今始成歸。金鏡山南射虎。  
更淋漓醉墨。染弓衣。白馬青絲未了。霜鱸紫蟹空肥。擁麾清渭駐全師。落日  
二陵西。早一騎黃塵。數聲清角。東下旌旗。依稀四明狂客。看江湖滿地。鷓鴣飛。  
無那孫郎病骨。不勝玉繞金圍。

羨門曰。想見傅修期一流人物。山來曰。  
此調二字句最難安頓。今三闕俱妙極自然。

又寄武會。

故人知我在。枉尺素。自菰蘆。想秋錦堂中。蕭然四壁。鶴徑親鋤。蘧廬不堪回首。  
望青山一髮。淚痕枯。九日龍番葉落。三秋葛鏡霜鋪。歸歟。迢遞歲華徂。渺渺  
正愁予。想夢覺沉吟。鳥名脫佛魚。喚嬾隅。南湖先生健否。正長安冰雪上鬢鬚。  
辛苦馮唐老矣。煙波垂釣何如。

漢門曰：青山一髮淚痕枯。視別淚滴清潁。其句彌工。其情彌苦。曾曰：洗馬言愁。令人心折。況聽者如予也。雙鯉南來。斷腸久矣。

又送徐方虎  
假歸。

官河懸夕照。帆十丈影垂垂。正白露橫空。寒螿聲急。蘆葉爭飛。追隨。東門千騎。  
羨相如擁傳。有光輝。驛路水明沙碧。江鄉蟹美鱸肥。東籬無恙。柘桑圍。罨畫  
越來溪。早魚鳥關心。煙霞寄傲。才子初歸。撚藜龍門太史。擬江山賀監。是耶非。  
莫戀紫萼紅蓼。來司玉册金泥。

漢門曰：茗雪故當不讓鑑湖。  
山來曰：逸興過飛。

桂枝香

嶼。

風清露細。早稻熟江鄉。嫩涼無比。八跪雙螯。郭索迷離煙水。斷蘆折葦洲邊憩。  
羨輪困行沙如駛。寒潮來去。孤舟沒滅。漁燈初起。正好是荒村雨霽。問何人  
簪簪。蕭然汀嘴。小市平橋過處。霜天凝紫。橙黃橘綠登高會。醉東籬酒人風致。



依稀記得魚莊設籪。夜分無寐。

武曾曰：兩尾句的是齊魯間風景。輟筆有鄉園之思矣。鳳子曰：描寫入微。讀橙黃橘綠數語。更令人食指欲動。真不數一殼玄黃玳瑁膏也。

齊天樂蟬

前身疑是空山侶。遺蛻杳然仙去。露給資糧。形藏密葉。有得孤高如許。綠陰亭午。引天籟笙簧。移宮換羽。雨後微涼。餘音搖曳過庭樹。依稀銀鴈柱緊。被晚風吹斷。曼聲淒楚。八尺琉璃。半簾蒼翠。睡起了無情緒。秋來更苦。咽四壁寒蟲。無聊和汝。且莫哀吟。覓疎林宿處。

錫鬯曰：數語極似草牕。山來曰：形容盡致。後半闕更具疎引清商之感。

又春晚同諸子遊祖園

城南韋曲東風路。長路綠暗如許。帽影參差。衣香掩冉。漸入水雲多處。閒亭列俎。似鮭菜江鄉。茶煙顧渚。浣盡京塵。一雙布穀樹陰語。深卮且共斟酌。怕穿

林風雨亂紅無數。節過浮觴。人同荷鍤。作達全忘羈旅。遊絲飛絮。倩燕嘴蜂須。將春繫住。芍藥開時。又攜尊看去。

其年曰。流連節物。愛惜景光。遂爾一往盡致。  
山來曰。燕嘴句幽荷安閒。令人咀嚼不盡。

水龍吟 詠柳絮。用坡公楊花韻。

千紅萬紫誰留。頻驚暗裏韶光墜。飛來何處。漫天香雪。撩人情思。纔過平橋。又穿小徑。柴門深閉。任蜂鬚燕嘴。交脚不定。三眠了。還三起。記得鵝黃初攢。等閒間。又成虛綴。曉風乍引。離魂難定。杜鵑聲碎。飄泊無心。輕狂有態。恨拋流水。願年年常傍。永豐坊側。看伊清淚。

阮亭曰。與羨門蝨蓮二詞。可以頡頏。  
武曾曰。冷荷疎葩。妙無組織。

又白蓮。

平湖煙水微茫。箇人彷彿橫塘住。碧雲乍起。羽衣初試。靚妝楚楚。露下三更。月

明千里。悄無尋處。想蘆花蘋葉。冥濛一色。迷玉井峰頭路。莫是苧蘿未嫁。曳明璫若耶歸去。遊仙夢杳。瑤天笙鶴。凌波微步。宿鷺飛來。依稀難認。風吹一縷。泛木蘭舟小。輕綃掩映。問誰家女。

其年曰。人常呼衍波爲王桐花。閱此闕我欲呼先生作曹白蓮矣。武會  
曰。供奉醉中作白蓮序。宮人以冰水沃之。若朗吟斯闕。自當勸以香醪。

又春日送客過慈  
仁寺感舊。

尋常彈指聲中。優曇偶現空王地。海棠着錦。丁香衣紫。霞烘煙細。急管哀絲。青衫白袷。嬉春情味。嘆穠華電擲。風流雲散。容易下中年淚。身是金閨倦客。賦渭城重過。蕭寺倡條冶葉。笑人岑寂。樹猶如此。只有孤松。似曾扶我。當時沉醉。倩禪燈老衲。往來指點。說花榮瘁。

其年曰。未免有情。誰能遣此。讀此數過。髣髴洗馬渡江時也。武會曰。  
俯仰陳蹤。如訴如怨。僕本恨人。何能再讀。山來曰。一字一珠。

又詠蠟  
梅。

嶺頭異種誰留。檀心初暈，猶含凍。輕黃試着。歌翻金縷。曉風吹送。剪蠟王郎等閒粧點。珠珠成鳳。想壽陽閣下，飛來一片。遠山際。蜂黃擁。記否師雄曾夢。月朧朧。拂衣寒重。颯然驚覺。天空雲淨。翠禽微哢。乳色侵鵝。流光照夜。暗香浮動。願明年更綴。如來金粟。淡煙低攏。

羨門曰：用蠟事僻而巧。典而新。

山來曰：工于賦物。千古獨步。

憶舊遊

題郭熙秋江行旅圖。

看迷離一片。淼淼洪波。漠漠平沙。烏柏丹楓岸。問何人。驢背悵望天涯。驚風亂葉飛墜。帽影任欹斜。况幾縷殘雲。千尋疊嶂。滿目蒹葭。荒寒入眞境。是舊日河陽。貌寫煙霞。曾記遊吳楚。泛扁舟。東下指點神鴉。少年回首一夢。江上聽悲笳。更對此何堪。京塵如霧。開棟花。

瑞鶴仙

詠灌嬰廟瓦硯。照夢牕詞填。

嶙峋黃玉璞。化陶泓光怪。藝林棲託。梅花費雕琢。問何時出土。琉璃如削。漢家封爵。是穎陰諸侯刻桷。嘆灌池遺廟荒涼。悵悵風雲刀槊。猶昨榮陽屯後。白馬盟書。丹青酬酢。幾年索寞。人礪劍。牛磨角。論功高。值得詞華消受。十二龍賓盤礴。試代他盾鼻磨來。筆花亂落。

阮亭曰。賦廟。賦瓦。賦硯。凡作數會洗發。劍芭蕉手也。其年曰。人礪劍六字。是張王樂府中語。

宴清都

詠宋人大食  
羹茶杯。

猶帶鯨波冷。遙天色。斷雲微露清影。玻璃質脆。盈盈不類。汝哥官定。曾隨貝葉金書。煩赤鬪拳鬚管領。而今作承露銅盤。僊人淚滴猶剩。思量紫袖昭容。白頭阿監。深夜調茗。松濤罷響。流泉淡注。碧梧銀井。那堪回首天上。空暗憶龍團鳳餅。伴高齋瀟灑琴罇。小牕日永。

阮亭曰。無中生有。前段似閩立本畫。後段似唐人華清宮詩。其年曰。秋槐葉落。滿紙閒愁。山來曰。渲染自然。饒有瀟灑出塵之槩。

花犯

詠花  
鴨

傍雕欄啄花啜葉呼名任遊戲。依稀蘆岸。蘸拍拍煙波。成隊飛起。紅裙偷裹。採蓮女船頭競弄水。好趣取碧天雲淡。桃榔斑暗記。何人竹弓莫輕彈。鴛鴦交頸處。驚他濃睡。爭撲鹿。澄潭下嫩黃難比。渾迷却斷霞一點。看隻影橫斜。穿暮紫倩去伴甲煎銀葉。躡跚香霧裏。

其年曰。字字研細。鈞別入微。山來曰。于枯題中有掉臂遊行之樂。洵是天才。

臺城路

詠隗囂宮  
葵盃

丸泥不閉函關路。神功煨來杯罌。色映琉璃。聲隨哀玉。淺碧嫩黃交射。流霞欲化。想西伯雍容。葡萄傾瀉。紫殿基平。何人收拾夜泉下。千年又成廢寺。早霜鐘粥鼓。相伴清暇。土嚙花斑。魚吹浪白。過眼興亡難話。誰堪並價。有銅雀荒臺。尙留殘瓦。且盡深卮。任更闌燭炮。

阮亭曰：起句奇陡。匪夷所思。  
其年曰：一起亦屬神煥。

又遼后洗  
粧樓。

東樓春色天邊落。來時白蘋風作。鳳輦曾留。瑤臺乍起。粧點遠山眉角。宮蟬綽約。想欲動晨光。未垂簾箔。炫轉熒煌。明星一一帶池閣。興亡幾番過眼。聽遊人指說。斜照城脚。窳堵波高。雨淋鈴急。壞磴莓牆蕭索。驚飈振籥。是曲裏琵琶。白翎哀雀。只有長河。潺湲聲似昨。

其年曰：隔江商女。猶唱  
玉樹後庭花。均茲妍婉。

又送分虎歸  
長水。

秋陰慘淡天如墨。城頭角聲初起。野水長橋。炊煙小市。魚尾斷霞成綺。羈愁未已。怕土鏗荒涼。夜長難睡。人影幢幢。一行清露曉風裏。分湖紫蟹正美。桃鄉新稻熟。流匙香細。白鴈縱橫。黃花爛熳。還憶離亭曲子。行滕漫試。便脚底匡廬。

不如歸計。霜冷吳根。扁舟棲暗葦。

柳色黃

對雨。和竹垞。

柳絮爲萍。梅子漸黃。天氣如許。溪雲乍起。遮山釀。做幾絲微雨。東西不定。搖拽淡霧。輕煙荷錢。一一跳珠露。庭樹碧參差。蔭青苔無數。平楚斷塘遙指。如髮秧針。綠迷南浦。暗想空江。軋軋唯聞柔櫓。亂紅無影。寂寞靜掩疎籬。銅街溼糝香塵路。倩斗帳高眠。小牕邊聽去。

拜星月慢

秋日雨後。飲宋子昭新泉座上聞歌。

撥亂苔錢。差池菱葉。白板橋邊秋水。點點浮漚。溜銀塘珠碎。斷雲溼。拖逗餘霞明滅。暈作遠山螺髻。薄暮罇開。正玉簫聲起。顫冰絃百轉。春鶯脆。西風冷月落朱門閉。一朵兩朵幽蘭。共荷香迢遞。汲新泉乍試。龍團味。紅燈小不照愁人醉。待歸時露滿閒塔。有吟蟲伴睡。



霓裳中序第一

詠龍鬚·爲渭清賦·

崢嶸勢猶怒。誰向層波剪冰箸。憶當日青天乍擘。伴火鬣朱鱗。度雲穿霧。清秋島嶼。抱驪珠濃睡。腥雨莫也是涓淵戰罷。飄落翠蓬路。羈旅生涯如許。還藏得鮫宮幾縷。輕綃鈿合潛貯。怕一夜驚雷。破壁飛舞。何人拾鳳羽。便鬪草休教換去。他年事天風鶴背。拔下又重數。

阮亭曰·起句突兀·前段離奇光怪·似錢唐君破陣樂·結句有割垂龍左耳之興·其年曰·離奇怪詭·筆墨之妙至此·如鼓天風海濤之曲·令我三日耳聾·

又爲杞園題  
浮家圖·

煙波寬幾許。抖擻青箬垂釣去。恰流水桃花時節。對西塞山前。一雙飛鷺。高風可遡。倩生綃三尺。留取看歷歷筆牀茶竈。泛宅畫中住。今古逃名漁父。怕東華軟紅如霧。江湖自結鷗侶。正柳下移船。菰邊分路。美人共蘭渚。又何必天家賜與。仙槎上此生有分。鼓枻帶箬否。

綺羅香

宋牧仲座上聞歌。

抹麗凝香。池塘過雨。屈注明河天際。雪酒銀桃。六月燕山風味。倩數聲玉笛吹來。似一串驪珠擲碎。看盈盈初日芙蓉。雙瞳剪水兩眉翠。青衫留落舊客。遮莫嬌絲脆管。難令沉醉。幾點螢光。猶照蒼苔無寐。好宮調賀老教成。倦心情屏風立地。漫流連入破伊州。記楓香曲子。

其年曰。石嘯春鶯。屏花俱碎。鳳于曰。一種生香。不涉柔靡。

又 沈融谷新娶夫人善奕書。同人共賦。

柳密藏鴉。堂空語燕。大好天桃天氣。蝶粉初消。二月東風破睡。鏡奩映筆格珊。瑚硯匣伴眉粧翡翠。最憐他腕底橫斜。烏絲閒寫麗情字。珍珠指下亂撒。彈入明光一曲。聲隨流水。兒女喁喁。點綴小牕幽致。妒兩行銀鴈輕飛。墮萬里玉關清淚。記夜深金鴨燒殘。迷離香霧裏。

瀟湘逢故人慢

張疇峯修雷琴成有贈。

千年神物是天寶元音。宣和遺譜。零亂金徽苦。想閱遍繁華。遽然今古。流水高山。彈不盡。喁喁兒女。當此際。燕市重遊。白髮郎官知汝。續鸞膠。調鳳味。早韻磬瑤琮。響泉淒楚。百衲還堪鼓。似海岸。窈冥成連徑。去危柱。哀絃抵多少。驚沙飛雨。再等到。蛇蚺紋成。又是幾番日暮。

阮亭曰。董大琵琶。申湖子籥築。張猩猩湖琴。諸作可以並傳。其年曰。碧桃已謝。素柰方開。閱未數語。殊有觀河面皺之感。武會曰。操縵金門。商聲淒婉。歐公晚得雷琴。而意愈不樂。豈真在人不在器耶。

永遇樂

送孫杞瞻學士歸省。

十丈蒲帆。一篙秋水。仙舟天際。繡虎才人。珥貂貴客。歸作承歡計。當年射策。五雲日下。臚唱魏公第二。羨璧人天街衣馬。夾道爭看如蟻。紫宸朝罷。講筵初御。金碗天漿親賜。東觀深嚴。北門清切。待署黃麻紙。君恩暫許。湖山佳處。添箇

宮袍萊子須珍重。黑頭卿相。碧紗名氏。

孫仲愚曰：一字移贈他人不得。所以大  
家。山來曰：盛唐應制。遜此清華。

又和人望  
嶽山。

誰鑿鴻濛最驚人處。芙蓉千丈。激蕩疑潮。崩騰似馬。羅列兒孫狀。八荒雷雨。一  
天蒼翠。縹緲靈旗想像。待清秋。憑陵絕頂。畫裏秦川如掌。潼關孤聳。黃河東  
注。俯覽翻增惆悵。颯颯天風。泠泠環珮。九節仙人杖。咄哉韓子。蒼龍迴馭。那得  
褰衣長往。耐可拉青蓮居士。三峯高唱。

羨門曰：于鱗曾有言。太謙以拙句取雄。不謂又  
逢勁敵。讀起三句。便知非太謙不足當此。

消息和錫鬯度  
雁門關。

蕭瑟關門。西風吹雪。貂裘都偃。蟻垤行人。羊腸驛路。哀角邊聲怨。魚海冰寒。龍  
沙戍斷。歷亂蓬根飛捲。悵青衫。暮雲驅馬。望盡蒼蒼修坂。絕壁祠堂。趙家良

將入夜靈旗如電折戟沉沙老兵拾得磨洗前朝辨塞鴈南飛溇沱東注可惜  
英雄人遠問誰是封侯校尉虎頭仍賤

羨門曰：度鴈門作悲壯語。人盡知之。有如此雄渾蒼老否。阮亭曰：集中和錫鬯塞上諸作。皆有龍象蹴踏之勢。朱十幾不能堅其壁壘。其年曰：廢驛荒祠。長吟曼嘯。當今不得不以此事推袁。

秋霽本意。

過雨長天早露重閒階新月如沐射角明河垂簷珠斗苔影上人眉綠流螢誰  
撲霜紈小扇銀塘曲渾無寐風度藥欄戛戛響修竹漏殘酒醒篆冷煙銷隱  
壁秋蟲似伴幽獨拂莓牆花香作陣秋蘭綽約疑空谷故國難窮千里目悠然  
歸興只在黃葉村中白蘋鄉裏數間茅屋

錫鬯曰：其源出于遺山。其年曰：我欲倩虎頭寫此數句小景。以當還鄉何如。

南浦春水。用玉田詞韻。

新漲碧于天。近清明。做弄橫塘晴曉。輕燕掠波圓。靴文細。一片麴塵誰掃。魚梭織影。跳珠只似荷錢小。催雨東風寒。又暖。綠遍長堤芳草。漫漫別浦。灩澦驚畫船。簫鼓。鷗眠未了。鴈齒接紅橋。漁莊遠。何處鳴榔聲到。斷煙渺渺。斜川如帶。平蕪悄。撲面楊花飛作陣。添入浮萍多少。

武曾曰：鷗眠未了。襯簫鼓句下。輕俊欲絕。  
山來曰：情景兼至。備擅詞場之勝。

又秋水。再疊前韻。

片月映寒汀。碧澄澄。人對江山清曉。綠淨繞柴扉。晴磯上。掃有垂楊先掃。蘆花似雪。連拳鷺占圓沙小。淡抹遙天渾一色。夾岸粘雲衰草。百川爭赴長河。看魚牀燈火。黃昏近了。白露老蒹葭。清歌發。無數採菱船到。平湖浩渺。芙蓉落盡空潭悄。又是霜明波冷後。此際撈蝦人少。

武曾曰：郭熙畫記秋山明淨而如洗。此語只如秋水。詞中澹抹遙天渾一色。此句卻似秋山。然互易便成死句。非解人那得知其故。  
山來曰：合春水作觀之。一句不可移。

易·真化  
工筆也·

花發沁園春

詠司馬相  
如私印·

倒薤披離。朱絲零亂。土香苔葉交亞。龍文覆斗。天色垂陰。溫潤玉情堪把。千秋  
作者字裏認當年。司馬嘆經過華屋山丘。閱人良自多也。辛苦臨邛書劍。倩  
何人昆刀刻鏤風雅。凌雲賦就。卓女粧成。十樣蠻牋親打。纖纖欲下。早逗漏明  
紅一罇。好留伴硯匣琉璃。冷光朝暮相射。

其年曰·筆情淡冶·亦似卓家眉黛·  
阮亭曰·便以風致勝·

又賦得流水  
桃花色·

萬點殘紅。五更微雨。夜來初葬傾國。暗落無聲。飛流不定。染就明霞一色。鮫姝  
淚織似淡抹胭脂還溼。最好是啖影游魚。儵然身住花宅。莫也神仙作劇。賺  
溪邊漁人。歸路難識。一篙渡闊。千尺潭深。根葉漫從尋覓。珊瑚浪擲。任送下東

溟無力蕩空濛。水氣花光，赤城雲起相射。

武曾曰：流水桃花，繪家須用沒骨乃合。先生之詞得之，拙手但摹色相，縱饒光澤，只是剗下桃油瓦耳。

尉遲杯

詠朱碧山銀槎。照蔡松年詞填。

黃流注送扁舟似葉凌雲渡。蟲書猶記當年想見良工心苦。何人稱杜舉，都不管華堂幾朝暮。但茫茫醉了還醒，夢裏居然千古。因思博望去遠，縱首稽葡。回首非故太乙爐開，朱提液冷，好泛明河深處。問此去盈盈一水，曾否有黃姑相逢語。慢學他羽化神奇，酌盡天漿無數。

阮亭曰：足與顧菴長歌並傳。山來曰：刻劃處都無斧鑿痕，所以爲佳。

望遠行

詠延陵季子劍。

寒星黯淡青銅色。出匣驚飛風雨。龍鱗三尺，虎氣千年，彷彿精靈堪語。記得當時，曾帶故人荒隴。此道于今如土。挹神光重見，冠裳楚楚。賓旅鳴珮，中原歷



聘。只解識寸心相許。回首蘇臺。魚腸忽起。散亂長鉞無數。試弔要離墳草。鷗夷潮水。一樣英雄難訴。對州來君子。恩讎忘否。

阮亭曰。題中題外。無一不到。其年曰。偷聲減字。吹出吳越春秋。

解連環詠蘆花。遙和錢舍人。

驚風淒切。滿江干一片。凍雲吹折。飄萬點不辨東西。枉賺得行人。鬢絲添雪。明月光中。隱沙岸。鴻聲清絕。更閒隨釣艇。暗入柴門。伴人騷屑。助他怒潮鳴咽。捲興亡舊恨。浪花明滅。笑垂楊只解飛綿。難點上征衫。迷離成鐵。露冷蒹葭。還記得綠芽如髮。問故家秋娘何在。風流總歇。

錫鬯曰。湘瑟原詞。工緻已極。未若此意態橫出。正無異子瞻之和質夫楊花也。其年曰。換頭以後。有五十二顆真珠盤旋紙上。既庭曰。滿地蘆花和我老。舊家燕子傍誰飛。同此淒涼感切。不獨調之珠圓玉潤也。山來曰。不着色相。偏饒斌媚。

一寸金詠長平遺鏃。

數點寒葦入眼離離土花碧。是咸陽王者神兵親鑄。沉沙千載。耕夫重得。黯黯黃金色。試磨洗猶堪穿石。笑平原計誤。馮亭圍合。邯鄲幾輕擲。暗想當年武安初將。疾聲撼趙壁。早沙蟲猿鶴。一軍都化。粘雲衰草。戰場如昔。鬼哭西風裏。最慘澹天陰月黑。乍摩挲線齒銀闌。怕帶青燐跡。

阮亭曰。字字神境。一篇弔古戰場文。筆力如牛弩。其年曰。仍是實菴詠史詞。

風流子 京口懷古。

三山圍鐵甕。孫郎後。今古幾英雄。憶北府參軍。寄奴王者。金戈鐵馬。橫據江東。凌敲上。歌風追漢帝。置酒宴羣公。一代偉人。龍行虎步。十年征戰。洛下關中。祇今憑弔處。佛狸祠下路。煙樹冥濛。爲念尋常巷陌。社鼓連空。算礪礪戰地。幾多白骨。金焦名勝。兩點青峯。惟見驚濤滿眼。東去匆匆。

阮亭曰。偶儻權奇。如此氣概。自非靈寶敵手。唐人宋祖凌敲之詠。直田舍語耳。其年曰。跳盪恢奇。激揚頓挫。讀此詞覺稼軒千古江山一首。猶非俊物。

又金陵懷古

大江流日夜。寒潮急。寂寞打空城。想玉樹曲終。梁塵爭落。金釵垂後。斜月低橫。如今但。荒臺存瓦礫。廢殿走鼯鼯。桃葉渡頭。半篙春水。莫愁湖畔。一片秋聲。南唐成往事。攝山看斷碣。夢裏三生。千載澄心堂紙。撥鐙書名。歎衣冠王謝。高低禾黍。文章庾鮑。冷落沙汀。依舊龍蟠虎踞。渺渺峯青。

阮亭曰：換頭妙入三味。非慧業文人不解。括盡梅邨秣陵春一部傳奇。其年曰：風景不殊。舉目有河山之異。何必新亭酣譙。纔能流涕也。

又姑蘇懷古

胥門懸落日。東風軟。人立小斜廊。是越女靚粧。舞停歌罷。捧心無賴。展轉迴腸。難重問。錢江煙水白。橋李陣雲黃。歌吹海中。荒哉且暮。溫柔鄉裏。老矣君王。勾章烽火急。見姑蘇臺畔。長劍如霜。誰念鴟夷相國。目斷危檣。早輕裝一舸。浮家遠去。功成身退。磊落行藏。回首故宮花草。難遣茫茫。

阮亭曰：姑蘇錢塘，兩起句尤勝。其年曰：繁華逝水，樂往哀來，此昔人所以不待管絃終搖鞭背花去也。

又錢塘懷古。

英雄開草昧，山衣錦，萬弩射潮低。彼吳越一王，高車駟馬，威靈五季，玉册金泥。驚回首，西陵煙月淡，葛嶺斷霞飛。三竺六橋，老髯曾醉，斜風細雨，和靖頻題。六飛南巡後，西湖比西子，綠拆紅欵，惟憶金明池水。禾黍離離，想德壽重華，兩宮避幸，綺羅絃管，繚繞蘇堤，千載江山如故，還使人悲。

阮亭曰：起句絕似杜公慘澹風雲會。古稱謝朓工於發端，較此四章未知孰爲伯仲。通體感慨淋漓，警效作洪鐘響，真奇作也。羨門曰：許渾劉滄，以懷古稱雄唐季。此詞亦詩之劉許。錫鬯曰：懷古四詞，非蘇非辛非劉，絕似陳經國。其年曰：此四闋，吾欲倩高漸離荆卿諸人歌之，若賀懷智張野狐一輩，縱能略說興亡，不過喁喁兒女語耳。切勿令唱此等詞也。旣庭曰：昔人稱馬中赤兔，人中呂布，與今詞中珂雪，皆千古絕調也。鳳子曰：四闋中忽爾犀弩霜鋌，亦間作鬢雲香雨，似柳秀才宴龍宮細聆破陣還宮樂也。武曾曰：四詞非十五女郎所按，又非大江東比也。其年擬以悲歌擊筑之間，知言哉。山來曰：懷古情深，激昂憑弔，自見豪邁凌雲之氣。

又題劉岱儒葭水山房。

城南泥水路。蒹葭滿。白露曉蒼蒼。想茅屋數間。中央宛在。青篲箬笠。何處鳴榔。  
漁歌發。斜風楊柳岸。細雨薜蘿牆。鷺立晚汀。點開波面。鴉翻亂葉。界破殘陽。  
伊人高臥處。有茶鐺。丹竈布被繩牀。遙指軟紅十丈。應笑人忙。似煙波釣叟。浮  
家泛宅。魚鰕結伴。雲水爲鄉。誰道桃花片片。誤卻劉郎。

羨門曰：擬情好手。寫此一段作畫。恐畫亦不盡也。

疎影

詠落照。遙和錢舍人。

斜陽欲下。學西流弱水。如電傾瀉。未免多情。弄影蒼然。迴光更戀亭榭。明霞幾  
縷。霜天赤。掩映作江山圖畫。最撩人。烏柏丹楓。常是借他聲價。依約黃昏近  
矣。齊飛並孤鷺。秋色瀟灑。莫向樓頭。賺得愁人。一地迷離生怕。平蕪衰草。淒涼  
處。有多少。暮雲歸馬。倩開元。小李將軍。海岸斷紅描寫。

其年曰：襯一筆。皴染入微。山來曰：恐  
小李軍描寫不出。不如仍倩佳詞寫之。

又黃梅  
和武會

春前數點向水邊林下孤影凌亂圓磬開時一抹檀心明霞暈去還淺分他厓  
蜜餘甘後怕金粟如來窺見映短籬初月微昏迢遞暗香門掩蜂凍寒聲細  
細偶來覓蕊處飛入難辨莫是僊人淚滴銅盤幻作此花生面誰家少婦年年  
織織不到乳鶯嬌倩趁夜燈移近罇前驗取珀光濃淡

其年曰：織側取姿。絕似張玉田手筆。  
山來曰：探花成蜜。紅紫皆甜。

又詠金絲  
荷葉

絲縈別浦似嫩荷出水青青如許弱蕩牽風乍密還疎不礙蜻蜓來路何人種  
向西牕外添幾點黃昏微雨若遣伴翠蓋紅衣玉井更無尋處誰把嘉名錫  
汝傍蒹塘蓼岸歌罷金縷淺碧初勻手弄柔波淡淹難成珠露深秋怕作闌珊  
別共三十六陂淒楚且逐他荇葉田田一曲風潭清暑

八寶粧

詠未央宮  
銅奩

渭上西風漁牀晚照鐵網千絲初舉翡翠迷離光映水一片苔痕淒楚咸陽遺製花天月地樓臺蜂黃蝶粉重重護細字蟲魚繡斷依稀金縷未央拋擲何年昆吾村外溼燐入夜偷聚慣點綴鮫宮眉嫵問飛燕菱花曾貯思伴侶銅駝陌上黃昏聽盡瀟瀟雨算流落人間玉箱也出茂陵去

阮亭曰：詠一物具興廢之感。如讀昭陵玉匣之句。其年曰：讀竟。我亦欲效陌上銅仙。淚下如雨。

霜葉飛

村居

數間茅屋荒原悄。紆迴樵徑幽獨。半竿斜照亂鴉啼。早隴頭歸牧。點幾樹丹楓似簇。空林墮葉聲續。喜野老忘機。共領略清泉白石。閒伴麋鹿。入畫范綏倪迂。柴門雙掩。靜對千尺飛瀑。繩牀高臥聽秋風。問何榮何辱。漫料理牛衣翠。覈凝寒未到深谿谷。倩濁醪消長夜。醉裏生涯。悠然良足。

其年曰·似向子諱·山來曰·如讀歸去來辭·

蘇武慢

元宵雪後作·

皓魄初圓。罡風猶勁。剪破彤雲萬里。桂影扶疎。嫦娥清冷。白玉樓頭似水。銀花作陣。火樹迷空。照見離離珠蕊。想蜀天積雪。峨眉崖下。佛燈如此。何須問雙鳳雲間。六鰲海上。簫鼓聲中。燕喜竹葉橫牕。松陰滿徑。有箇幽人在裏。白眼誰同。青罇易歇。赤脚層冰遊戲。應難尋千樹梅花。長笛一聲而已。

羨門曰·松筠之況·冰雪之懷·柳州所云·悽神僧骨·境至清也·其年曰·字字清絕·是瑤臺閬苑中人語·武曾曰·峨眉佛燈·自有雪以來未經人道·

惜餘春慢

雨

窈窕紋紗。參差曲檻。無計消他長夏。金鉦匿影。石燕穿雲。縹緲靈旗來也。隱隱輕雷度時。不惜眞珠。拋殘盈把。似湘妃游泳。玉徽零亂。冰絃彈罷。又疑是破陣錢塘。青天飛去。雪霰一時交下。介山昨夜。風雨黃昏。霹靂車憑誰借。惘悵方



塘碧筒出水初圓。怎禁狼藉。助新涼。午夢繩牀。彷彿聲飄鴛瓦。

沁園春

長夏少事。撫枕輒睡。夢境荒忽。不一而足。因集古人夢事成篇。

梧影初回。槐角風涼。引入華胥。見蝴蝶園中。翩翩晒粉。邯鄲道上。袞袞騎驢。蕉鹿慵看。櫻桃空啖。擬上蚍蜉王者書。南柯郡。有同昌嘉禮。覓醉何如。排空馭氣歸歟。更嬈嬈巫雲送我車。問風雨連宵。西施曾葬。鳳凰再降。蕭史焉居。黍米山川。蘧廬將相。一瞬悲歡付子虛。醒來後。對荳棚茗椀。半晌躊躇。

羨門曰。足敵子山一賦。阮亭曰。令我說夢不能到此。其年曰。讀未數語。是黃梁初熟時。山來曰。如許夢境。抽揚曲盡。真大夢而大覺者。

又贈柳敬亭

席帽單衫。擊缶鳴鳴。豈不快哉。況玉樹聲銷。低迷禾黍。梁園客散。清淺蓬萊。蕩子辭家。羈人遠戍。耐可逢場作戲來。掀髯笑。謂浮雲富貴。麴蘖都埋。縱橫四座嘲詼。歎歷落嶽崎。是辨才。想黃鶴樓邊。旌旗半捲。青油幕下。罇俎常陪。江水

空流師兒安在。六代興亡無限哀。君休矣。且扶同今古。共此脚盃。

阮亭曰：柳生未足當。此借他人酒杯澆自己磊塊耳。扶同二字妙。贛君分別黑白。不免多事。其年曰：此詞旗亭畫壁久矣。今讀之猶如初脫口也。山來曰：快讀一過。如聽柳生擊缶雄談。

又病齒戲作。

檢點形骸。牙齒空存。凋零可哀。似潮嚙危巖。豁欲墮。蟲雕敗葉。次第成灰。活玉巢邊。大郎遊戲。狗竇從君出入來。昌黎曰：偷歲常落一兩紀。奚猜。只愁三五爲儕。拚一夜霜風散早梅。彼伏生牀上。傳經詰曲。張君柱下。覓乳徘徊。語怕成訛。食還喜軟。遮莫廉頗善飯哉。柔能久。但吾生舌在。暫此脚盃。

羨門曰：拊拾齒事殆盡。使王攜見之。何處更抽扇簞。阮亭曰：升老病齒一闕。雖稼軒復起。何以過之。叔夏公謹不足道也。其年曰：俶詭離奇。妙絕千古。武曾曰：嘻笑之章。亦復巉嵯峭峭。山來曰：我更愛其博奧。

又泛舟明湖。訪仲愚留飲卽事。李道思劉伯錢繼至。

所謂伊人。一水盈盈。欲往從焉。見鴈影蕭條。煙波上下。漁歌欸乃。荅簪便娟。雨笠煙篲。癭瓢竹杖。衰柳殘荷。望渺然。櫓聲斷。恰門橫短港。巷面青山。一觴一詠。流連殊不似。扁舟雪夜還。況高議雲生。尊同北海。勝流狎集。客比西園。鴻爪遭逢。萍蹤聚散。絕勝他人。交十年。拚沉醉。問中秋好月。可照湖干。

羨門曰。衰柳殘荷望渺然。勝於斜陽冉冉春無際。其年曰。結句沉吟不盡。大有不愁明月盡。自有夜珠來遺意。山來曰。如朝水淪漣。與月上下。

又題美人畫芙蓉。

嬈嬈亭亭。何處折來。芙蓉一枝。是青溪女士。寫生妙手。花光粉膩。遊戲爲之。縱使無情也。應有恨。月白風輕。欲墮時。堪憐處。傍沙汀蘆岸。掩冉丰姿。多愁多病。蛾眉便畫出。傷心寄阿誰。憶紅樓倦繡。輕拈小筆。烏絲罷詠。淡抹脣脂。更費雌黃。枝頭點染。添箇翩翩蝴蝶兒。吹能起。笑拂蠅成誤。老眼迷離。

羨門曰。渾脫瀏利。詞家所難。其年曰。點染寫生。不數南唐北宋。

又讀子厚新  
詞卻寄。

不見激庵。六年於茲。思如之何。憶大明湖畔。論心握手。之萊海上。痛飲高歌。以子襟懷。消人鄙吝。叔度汪汪。千頃波分。袂後想。生平意氣。暗裏蹉跎。驚聞二豎相苛。早伏枕山中。歲月多。幸清漳第近。時過小阮。人來不夜。問訊無他。拚事醫王。未驅窮鬼。且負青青六尺篔簹。長安市。悵故人疎放。老子婆娑。

羨門曰。不事雕鏤。俱成妙詣。此絢爛極而平淡生也。

憑藉飛鴻。貽我一編。花間草堂。喜風流旖旎。小山珠玉。驚心動魄。西蜀南唐。更愛長篇。嶽崎歷落。辛陸遙遙。一瓣香吟哦久。妬金荃佳句。遂滿奚囊。休論小弟行藏。歎筆硯年來。已盡荒縱。勞他精衛。難填閩海。傾來米汁。莫潤愁腸。烏亦傷心。花能濺淚。獨對東風舞一場。如何是。羨扁舟漁父。蘆荻蒼蒼。

其年曰。劉脫頓挫。想見公孫舞劍張旭草書時。來曰。先生長調。妙絕古今。此詞乃是自爲寫照。山

讀罷新詞，擊碎唾壺，悄然以悲。任邯鄲枕上，重裯列鼎，大槐宮裏，貂錦蛾眉。未了功名，難消磊塊，不向空門何處歸。又底事，問安期高誓，乞取刀圭。茫茫大造誰知。況世上原無真是非。彼南華齊物，呼牛呼馬，靈均呵壁，將信將疑。我賦三章，爲君七發，得愈頭風或有之。掀髯笑，望西山一帶暮雨迷離。

其年曰：僕題珂雪詞，有雄深蒼穩之贈，諸公試證曰讀此等詞，然乎否。阮亭曰：以詞代書亦奇。山來曰：讀世上原無真是非一語，不勝歎息。

又送藍公漪還閩。

閩海畸人，凌轢詞壇，飛揚若斯。況煙雲落紙，南宮北苑，錕鍔切玉，周鼎商彝。大翻山頭，鴻都門下，一藝分來自可師。延秋路，對西風黃葉，欹帽吟詩。滄浪遺派悠歸。除高稊林鴻更有誰。喜霜濃月白，共君一醉。短衣孤劍，此去安之三尺殘陽。兩行枯柳，衰草平蕪，有所思。今行矣，想舊廬無恙，松菊依稀。

其年曰：感慨辛綿，如讀許渾趙嘏懷古登高諸作。山來曰：如見藍公多才多藝。

又日照李伯開作生壙成。自題云。竹帛誰千古。  
煙霞我一丘。余喜其能達生也。詞以贈之。

表聖之徒。富貴浮雲。能齊死生。憶早年任俠。千夫辟易。中年策杖。五岳縱橫。紫  
塞黃榆。短衣孤劍。鬱鬱胸蟠百萬兵。今老矣。向荒山寄跡。汐社藏形。牛眠好  
卜佳城。便撒手懸厓自在行。彼麒麟。曩曩誰當不朽。煙霞沒滅。我本無營。大海  
潮青。嵐峯月白。樂此安知後世名。君無語。持黃金鑿落。飲若長鯨。

又再贈李君。  
聊廣其意。

日月跳丸。虎頭健兒。鷄皮老翁。笑求仙問藥。都無憑據。靈椿朝菌。一樣成空。羊  
角扶搖。枋榆棲止。總在茫茫噫氣中。何處問。有南柯太守。馬鬣高封。達人遊  
戲神通。便塚象祁連。蟻垤同。甚珠襦玉匣。牛羊廢壠。金甌銀鴈。禾黍秋風。天地  
遽廬。乾坤窳窳。千載王孫道未窮。今古恨。是白楊衰草。掩盡英雄。

八歸 題其年填  
詞圖。

散聖安禪。烏衣白袷。淡宕風流如許。酒旗戲鼓。人間世。博得蕭然驢背。鬚眉塵土。凌轢詞壇三十載。寫六代興亡無數。翻墨瀋歷落。嶽崎看海奔鯨怒。誰拂生綃作照。維摩清冷。坐對散花天女。三疊霓裳。一聲河滿。曲項琵琶金縷。問英雄紅粉。可到相逢斷腸處。想歌闌深卮微勸。銀甲春寒。水沉香慢炷。

賀新涼

再贈柳敬亭。

咄汝青衫叟。閱浮生。繁華蕭索。白衣蒼狗。六代風流。歸抵掌。舌下濤飛山走。似易水歌聲聽久。試問於今眞姓字。但回頭笑指蕪城柳。休暫住。譚天口。當年處仲東來後。斷江流。樓船鐵鎖。落星如斗。七十九年塵土夢。纔向青門沽酒。更誰是嘉榮舊友。天寶琵琶宮監在。訴江潭憔悴人知否。今昔恨。一搔首。

阮亭曰。贈柳生詩詞牛腰束矣。當以此爲壓卷。羨門曰。如柳州柳刺史。種柳柳江邊。涉筆成趣。修來曰。樞金戛玉。亦復石破天驚。得此兩作。敬亭不朽矣。其年曰。百十六字。括盡梅邨先生敬亭一傳。山來曰。兩詞嶽寄歷落。骯髒激昂。傳神阿堵。

又送周雪客南歸。

雲際孤帆卷。送將歸。登山臨水。離情難遣。年少周郎江左去。望裏寒林霜沍。問底事頻勞雙繭。奕葉才名推繡虎。共秦淮春水無深淺。逸興到剡藤展。風流顧曲亭邊顯。是何年看山讀畫。佳名題扁。擊筑燕臺文酒伴。自愧淮南鷄犬。驪駒唱寧須求免。歸矣青溪三尺棹。坐六朝金粉繙前典。江似練。爲君剪。

羨門曰。令人卻憶謝元暉。山來曰。險韻妙押。當與顧菴學士二十二章並傳。

敗葉西風卷。近河橋。六花片片。離觴聊遣。撲面驚沙似霧。日暮蘆溝冰泫。寒夜凍馬毛如繭。爲愛雲山歸去好。諒雲山於子情非淺。五岳志。向禽展。文章雖以幽棲顯。更須憑經綸大手。爲時盧扁。路近三茅丹鼎在。洞裏一聲仙犬。塵土夢知君其免。淮水東邊明月上。問齊梁佳勝何人典。春草綠。不容剪。

羨門曰。稼軒意得之境。其年曰。剪字妙押。



又寄李武曾·用  
朱錫鬯韻·

潦倒壇松醉△是何人△單衣白袷△維朱與李△十日蘆溝橋下別△上已清明之際△看  
匹馬蕭然高寄△幾度見詩詩總好△詠蠻花犴鳥無前輩△石鼎倡誰俟喜△杜鵑  
聲裏人憔悴△問何如東方索米△千金裘敝△身世頓成風六鷁△不僅文章而已△慚  
鹿鹿遂同餘子△夢裏故人頻握手△送離愁幾捺瀟湘水△可想見吾懷矣△

羨門曰·身世頓成風六鷁·真是不經人道語·未許輕分牙後·阮亭曰·  
驅使古人處·俱不見痕跡·故是神化·鳳子曰·毫端蕭颯作秋聲·

又壬子歲寄家  
弟用前韻·

猶記燕臺醉△歎無何△斷雲飛絮△匆匆行李△大纛高牙△今異域△縹緲碧雞天際△有  
蘋末清飈相寄△出守一麾誰抵掌△莫長風萬里成吾輩△不聞見那嗔喜△中郎  
阿大形骸悴△悵年年陟釐紙尾△毛君頭敝△自是不歸歸△便得柳下寧辭三已△須  
認取妄庸男子△夢裏相逢終幻劇△要徐牽百丈牂牁水△五岳志有年矣△

阮亭曰·字字臻到·山來曰·自是不歸歸便得·然歸後當如蒼生何·

又得來韻  
再和·

駘蕩春如醉。踏東華。軟紅十丈。隨他趙李。前路茫茫何所似。悶海難尋邊際。得新句佳名黔寄。聞道東山堪躡屐。須磨崖潑墨。驚時輩。頻置酒。羣公喜。天南地北人同悴。歎婆娑。潘郎鬢影。經霜先敝。三世金環誰認取。顧況中情難已。彼達者延陵季子。槐綠垂垂侵麥秀。動歸心。一片明湖水。長太息。吾衰矣。

羨門曰·使人作淥水芙蓉之想·其年曰·音節歷落·填詞神境·

修來曰·清健高雅·一洗靡靡之音·快極快極·山來曰·黔寄集已衣被海內·然未免有人琴之感·

又寄鄧孝威·

才子生南國。坐江樓。擁書十萬。百城難敵。高密元侯門第在。伯道清風奕奕。看威鳳。鸞龍氣色。屈指騷壇誰執耳。羨葵丘玉帛。長干側。千古事。名山得。慚余潦倒東溟客。望龍門。清塵濁水。蓬蹤疎隔。八月西風吹雁羽。漫學秋蟲唧唧。攜

布鼓雷庭偷擊。汪季比來情更好。似桃花流水深千尺。空夢到邗溝碧。

又送阮亭東歸。  
兼悼西樵。

倦客歸轅里。恰三秋霜林葉散。鯉魚風起。四角紅氈驀子背。躑躅河橋之際。趁不上東華宵騎。三疊淒涼渭城曲。感生平清淚如鉛水。知我者。惟兄耳。重逢蕭寺人憔悴。憶君家中郎阿大。清言何綺杳矣。人琴千載恨。宿草吞聲未已。離緒到中年如此。生不成名身已老。歎虎頭食肉非吾事。空擊筑。長安市。

羨門曰。送阮亭非此詞不稱。其年曰。長安秋夜。讀此詞一過。如聽鄰家笛聲。我不忍竟此曲也。武曾曰。尋常聚散悽惻。等於河梁。令人增交道之重。

又鴉陣。

鴉陣來沙渚。逗輕寒。霜天一抹。晚紅如縷。掠下晴牕驚帛裂。影逐斷雲歸去。伴黃葉蕭蕭亂舞。寒話空林飛且止。似商量明日風兼雨。聲啞啞。倩誰訴。黃雲城畔知無數。趁星稀月明三匝。一枝休妬。雁字橫斜。紛幾點。極目江村煙樹。惆

恨煞落霞孤鶩啼向碧紗堪憶遠。最淒涼織錦秦川女空房宿淚偷注。

羨門曰：更不須唱烏夜啼矣。阮亭曰：似商量明日風兼雨。句造神境。蛾帽曰：極類史邦卿詠燕。錫鬯曰：神似竹山。其年曰：作使古人。妙於無跡。真飛針繹線伎倆。武曾曰：是有斜有整。有分有合。正如章郎用越筆點簇鞍馬圖。手擦墨水。曲盡其妙。鳳子曰：梅溪詠燕。軟語商量不定。此商量風雨。當並推絕唱。山來曰：觸景生情。匪夷所思。

又放魚。

縱爾遊深壑。早徜徉靴文細浪。擲梭騰躍。老子長齋無所用。忍見刀砧揮霍。活汝者陽侯一勺。莊惠臨濠頻問答。子非魚何以知魚樂。吾意在神冥漠。金溝流水環城郭。更何殊滄溟無際。鯤鯨盤礴。幸免漁蠻垂釣手。咫尺江湖自若。從此去好生頭角。恩怨於今都忘了。任隋珠相報甘投却。看六宇莽寥廓。

羨門曰：想見寶庵胸次。阮亭曰：甚厭人輒以稼軒許人。如寶庵遂無愧色。山來曰：先生佐郡吾鄉六邑。皆有悠然之樂。於此詞可見一斑。又冬夜書懷。

斜漢西南落。正繁霜。關河淒緊。攬林風惡。歷歷大星垂幾點。光射五雲樓閣。聽寒夜數聲殘柝。濁酒一杯澆磊塊。笑枯腸那得生芒角。吾所志在林壑。鰕生福相天然薄。對西風稜稜瘦骨。支牀如削。老矣北堂人健否。夢裏乍逢還覺。慚愧殺林邊烏鵲。頭禿毛君歸亦得。淡生涯老瓦盆中樂。追覓憤力耕作。

羨門曰：激昂自喜。山來曰：英雄本色。名士風流。兼而有之。

又送

慘澹征車發。正連宵狂飈拂地。瑤琮金鐵。老淚臨歧餘數點。灑向關山殘月。笑舐犢年來更切。歸去高堂頻問訊。莫輕言遊子傷神絕。人兩地。腸千結。匆匆慣作天涯別。似孤鴻雪中留爪。翩然飛越。一束書囊驢子背。老僕長鬚整蹙。惆悵煞鳩巢計拙。弱妹牽衣遲汝去。意徬徨爲我添嗚咽。今夜在誰家歇。

羨門曰：情至語。聲淚俱咽。其年曰：讀至此等詞。不忍言佳。惟微吟密詠而已。

又爲其年  
題詞。

光怪騰蛟蜃化髯公。壺中墨汁。離奇輪困。海若驚飛。天吳走。翠節靈旗隱隱。憑誰話六朝金粉。譜入鷓絃三千曲。寫冰車鐵馬無窮恨。數紅豆。記宮本。烏衣王謝江東俊。是當年將軍猿臂。虎頭猶困。羸馬敝裘銅駝陌。博士賢良待問。賦朱鷺黃鸞惟謹。擊筑且隨屠狗輩。任西風吹老滄浪髻。秋氣肅。雁聲緊。

又送洪昉思  
歸吳興。

年少愁如許。嘆羈棲京華倦客。雄文難遇。廣漠寒風吹。鬢髮彈鋏歌聲太苦。且白眼看他詞賦。單絞岑牟直入座。拚酒酣搗碎漁陽鼓。欹帽影。掉頭去。湖山罨畫迎人住。溯空江白雲紅葉。一枝柔櫓。歸矣家園燒笋熟。五岳胸中平否。學閉戶讀書懷古舟過吳門。煩問訊。是伯鸞德耀備春處。魂若在。定相語。

又二月二日。宣岳州捷。  
是日大雪。和其年。

鐵騎連營下。羨奇謀。眞同六出。烽銷荆野。試問洞庭深幾許。春水纔堪飲馬。露布到甘泉宮也。殿上雲迷三素色。正仙人玉戲。飄駕瓦簾影動。冷光射。方圭圓壁。渾無價。近蓬萊。天顏喜氣。玲瓏欲化。白虎幢前霜戟擁。茶作軍容。豈借積三尺。瑤華不夜。遙想瑤樓歌舞處。延鄒生枚叟。珠璣瀉。恩波森入清灑。

又詠茨菰。

急雨跳珠濺。洗長汀。琅玕三尺。亭亭如箭。燕尾點波。渾不定。一縷碧霞輕剪。笑菱角鷄頭價賤。葉爛西灣人別後。最蕭條。玉露秋風戰。空極目。楚江遠。漂流萬顆沉雲散。伴寂寥。蓮房墜粉。紅妝零亂。蘋末驚颺。連紫籜。穩宿沙洲。鳧雁任漁艇。釣絲斜罨。聞道彫胡堪作米。莽披離太液池頭。徧留取配青精飯。

又地震後。喜濂至都門。

鉅觥啣悲喜。又經過。空花泡影。途分人鬼。瘦骨崑崑驢背下。強拭闌干別淚。帶

秋雨秋風情味△爾未成名吾將老△問荒田負耒何年事△生計在尙餘幾△傳聞  
消息驚千里△累衰親蕭條白髮△關心遊子△無限蒼生歸劫火△我輩偶然活耳△還  
共飽長安珠米△苦語難終嫌夜短△鐙熒熒一點搖牕紙△燕酒薄那能醉△

其年曰·樸老高渾·老杜歌行·  
山來曰·真率中自饒至味·

摸魚子拜墓·

幾年來西州拜掃△羊曇傷盡懷抱△心驚寒食棠梨雨△又是粘天衰草△尋壞道△知  
多少飛鳥啣紙青山繞△頽垣桑棗算只有牛羊△日斜來下△拍手牧童笑△千秋  
事誰定榮華壽考△北邙松柏多了△豐碑鼉鳳崢嶸處△一樣西風憑弔△吟望好△君  
不見玉泉流水濺濺到△單衫破帽對吹角殘霞△打頭敗葉寂寂古原悄△

羨門曰·色絲幼婦·蠶曰含辛·白髮門生·雍歌助挽·俯  
仰千秋·同茲一痛·其年曰·傷逝之言·極其悽惋·

又詠  
墓·



好清秋。江湖滿眼。畫船鷗鳥爭路。柔花嫩葉。何人摘。兩兩輕舸如鷺。君莫誤。須珍重。迷離白露爲霜處。滑絲凝筋。憶千里東吳。未施鹽鼓。入洛舊時語。青門外。蘋末涼風微度。片帆乘興歸去。此行但爲鱸魚鱠。那得關情如許。君莫妬。須記取。青山紅樹空江渡。夢回鳴櫓。溯萬頃平波。田田荇葉。欹枕對煙雨。

武曾曰：士龍語翻剔盡矣。正以直書見老。  
山來曰：逸致遙情。儵然自遠。

又西直門  
外作。

北邙邊。高低丘壠。縱橫無數。羊虎玉魚金椀。何時葬。又見斷碑如礎。魂自語。須認取。文章功業難憑據。白楊老樹。戰一片秋聲。向人頭上。颯颯作涼雨。西州路。敗笠青衫羈旅。緇塵撲面來去。黃蘆苦竹。千秋恨。都付紙錢飛處。天已暮。想入夜雲旗。風馬精靈度。荒涼三戶。共塚上狐狸。山中木客。同結歲寒侶。

其年曰：月黑燈青。魂消千古。絕作絕作。朱竹垞曰：此等詞惟白石飛仙有之。叔夏仲舉亦不能道也。書樵曰：白楊老樹以下。字字驚心動魄。

又答沈融  
谷

坐江樓。冰甌滌筆。新翻水調南浦。瑤華飛落長安市。紅豆譜來非誤。良夜聚。有  
多少。烏衣白帽同罇俎。悠然懷古。甚蘭畹金荃。尊前復雅。未抵玉田句。深卮  
勸。從事青州太苦。匆匆鮭菜無序。虎房橋畔霜花冷。撲上征衫如霧。君且住。君  
不見。團圓好月參旗度。高齋歸去。想鳳珠麟峒。龍賓磊落。又寫麗情賦。

又題錫鬯蕃  
錦集

鼻茶煙。吟成樂府。旗亭畫壁無數。龍樓一擲光凌亂。碎剪碧霞千縷。紅豆譜。彷彿似方圭。璧冰花鑄。高岑李杜。入主客圖中。新聲古調。總屬麗情句。前身  
是白石仙人非誤。精靈虎僕輪汝。長安簫鼓千門熱。閉戶著書良苦。寒欲去。又  
早。是春燈金薤琳瑯處。天衣重補。羨妙手針神。絲絲無縫。莫被夜來妬。

又寄贈史  
雲臣

繞荆溪。數間茅屋。竹山舊日曾住。吟花課鳥。無遺恨。領袖詞場南渡。逐電去。誰更續。哀絲脆管。紅牙譜。湖山如故。又幻出才人。鏤冰繪影。抒寫斷腸句。鷓絃上。彈入蝶菴金縷。平分鬢客。旗鼓。搓酥滴粉。方成調。偷換羽聲。淒楚。推獨步。須信道。秦黃蘇陸。無今古。江東日暮。想席帽風欹。春衫酒溼。行過翠籐路。

其年曰。結數語。如見蝶庵風度。

武曾曰。起調清蒼。尾音閒雋。

又方潤仁葺健松齋幸園松之存也。詞以贈之。

響晴濤。綠陰半畝。神龍拏攫煙霧。關門一亭。喧銅馬。波上鯨鯢爭怒。鳴戰鼓。有多少。蘭亭梓澤。皆塵土。午橋如故。縱劫火茫茫。斧斤不到。交讓大夫樹。江東秀。王謝衣冠最古。五陵佳氣。呵護霜皮黛色。年年在。點綴菊畦桑苧。俱園名。誰種汝。須記取。黃山白嶽。移根處。婆娑自舞。看五鬣蒼然。向人頭上。謾謾滴秋雨。

又謝念東先生惠藥。

問先生丹砂幾粒。是誰搓得如許。金膏九轉匆匆熟。吹落半天風雨。顏可駐。君不見淮王鷄犬雲中去。且留小住。待紺髮徐生。虬髯更紫。重覓玉京路。人間世。只有鬚眉良苦。地黃蘿菔相誤。黑頭自笑。渾無用。一任秋霜十縷。飄弱絮。有多少北邙年少無尋處。尻輪堪馭。縱親到神山。便能屈曲。俛首看人否。

其年曰：作違之言。更增悽楚。病中讀之。尤難爲情。  
山來曰：憂能傷人。恐羅敷地黃不任受過奈何。

金明池

大熱。有懷蓬萊閣。

大海涵青。丹樓聳翠。森森鴻濛奧府。蜃氣蕩雲。車鬼馬。貝闕擁蛟。姝龍女。望扶桑幾點煙螺。便打疊鰲背。匆匆歸去。更荒島人煙。斜陽草樹。鱗斲魚罾。淒楚安得披襟常臥。此對銅井金波。冰輪初吐。無從覓湘靈鼓瑟。但可向安期乞霧。醉婆婆晞髮臨流。任萬斛天風。捲晴吹雨。縱燦石流金。凭欄一嘯。試問暑歸何處。

阮亭曰：起二語奇偉，有千仞萬里之勢。  
其年曰：瑰麗非常，總是龍宮機杼。

笛家九日長安遣興  
和其年。

黃菊浮觴紫萸盈把，露涼風細，匆匆早是秋將暮。天街如蟻，燕尾鬢鬆，卓金車響，紛紛兒女，剪綵旗旛，花糕擔子，知送誰家去。葉爭飛，鴈初緊，只少滿城風雨。情緒不堪搖落，龍山戲馬，何處追遊，破帽單衫，一襟塵土。試問故國荒涼，宅榭草長，欲齊塔否。深巷人歸，華堂客醉，作陣鳴腰鼓。聊送目，夕陽邊，惟見碧雲千縷。

又九日蛟門招集諸子遊黑龍潭

野水拖藍，遙峯疊翠，嫩涼時候，閒人那不登高去。城陰杜曲，幾樹枯楊，幾層顏壁。當年遊處，橘井苔腥，曉堂霧溼，莫作重陽雨。話新寒，晚鴉急，客子羈愁添否。良晤峭帆乍歇，玉盤蝦菜，斟酌南烹，蟻綠鱗紅，十觴連舉。只少繞砌黃花爛

慢空負數聲金縷。拂拂鞭絲，垂垂帽影，行過風潭路。月上也，恰當頭，共聽荒哇人語。

其年曰：幽宵峰泓，似子厚遊山諸小記。山來曰：景中有情，詞中有畫。

畫屏秋色

送舅氏之唐山廣文任。

行李蕭條去，騁遠目，禾黍芄芄驛路。督亢陂荒，滹沱浪急，亂雲天暮。韋杜舊家聲，早打疊寒氈辛苦。聽一片鳴蟬訴。況夢繞西州，哀湍壞道，知在斜陽一帶。蒼然平楚。無語銷魂，羈旅更莫去。傷今懷古，十年踪跡，一番離別，悲歡無據。馬首又他鄉。烏衣巷口人何處。苜蓿闌干堪煮。上日及新秋，爲語天邊好月，分照兩人愁緒。

阮亭曰：生存華屋處，零落歸山丘。讀夢繞西州，哀湍壞道數語，令人氣盡。

蘭陵王

送二舅之沅州。

嶺雲白。湖草粘天弄碧。湘煙淡。沅水分流。弱柳絲絲。冒行色。武陵南下驛。漸入  
桃榔瘴黑。鶻聲裏。鐵騎連營。一髮青山望京國。依依感疇昔。記巷口烏衣門。  
邊霜戟。電光石火音塵寂。愁一肩行李。半林斜照。空祠榕暗。嘯木客。衡陽鴈程  
隔。難覓謝公屐。問橘井遺踪。郢雪荒宅。參軍蠻府。工書檄。念東第淒冷。北堂  
晨夕。寒蟿啼徹。聽砌語。助太息。

風子曰。語帶風煙。以此作南征障子。  
當夜聞水聲。不但鶻啼猿淚也。

大酺

石林席上  
聞絃索。

正酒船行人聲寂。好月如珪。偷照鷓鴣初入破。響風箏刀尺。麻姑手爪。銀甲徐  
調。冰絲輕撥。啄木丁丁。小鳥空山無人處。任花開花落。洞天深窅。忽變作玉關。  
千羣鐵馬。平沙衰草。吳儂歌縹緲。嘆舊曲誰似。臨川好。遮莫向岐王筵上。崔  
九堂前。琵琶彈出傷心調。未抵繁絃巧。引蝶翅蜂鬚相惱。但羈客青衫老。奈何

頻喚頓減中年懷抱。鬢邊明日白了。

玉女搖仙佩

興米紫來論詞。即書其集後。

才人剩技。削玉團香。有得離奇如此。繡嶺宮前。苧蘿溪上。一一傾城姝麗。更把繁絃倚。似飛仙劍客。乘風遊戲。怨離別青衫紅袖。消向琵琶羯鼓聲裏。沙石素然驚。苦竹黃蘆。暗啼山鬼。省識紅鹽妙理。換羽移宮。墮盡關河人淚。細數名家。晚唐南宋。漫說蘇豪柳膩。海岳當年齋。平分取書畫船中風味。又證入金荃蘭畹。小山白石。天花亂撒珊瑚碎。酒邊珍重烏絲字。

其年曰。迷離恟怳。渾脫激昂。都不作吳兒細咳。鳳于曰。駢金儷玉中。丰神飛動。此贈言絕妙好詞也。

又詠魚苔

剡溪玉葉。渲染神工。却倩銀塘丹鯽。波面揚鬚。鏡中吹雨。飄入碎萍無力。一抹空明碧。問何人拾取。水天顏色。欲偷寄飛瓊片紙。怕似方諸滴淚難識。驚萬縷



千絲莫是珠宮鮫妹輕織。不辨河山一氣潮。落潮平。納納乾坤生白。杳靄嵐光。迷離樹影。總帶蠻雲腥澀。造物莽搜索。有多少。寒火溫泉奇跡。渾未抵浮漚。隱現綠瀛滄島。苔痕掩映。荆關筆。憑誰爲訊。騫霄國。

阮亭曰：題不經見。詞亦迷離奇幻。如觀化人之戲。其年曰：一氣混茫。

多麗 送葉慕廬南歸

恰新秋。一夜涼颺聲急。指湘皋。晚煙淡處。章華臺下。荒宅挂蒲帆。白蘋鄉裏。鱸魚破玉盈尺。赤壁江聲。烏林戰地。楚南形勝。依稀記得。擊銅斗歌成。慷慨。棹碎空明碧。東籬畔。黃花滿徑。應待歸客。憶燕市匆匆。文酒西山。亂入遊屐。動公卿。五雲詞賦。才子人稱。揆天筆。姑射仙姿。苧蘿妹麗。如君流落也堪惜。悲團扇。班姬未老。永巷青苔隔。桑乾路。驢背書囊。席帽欹側。

其年曰：聲情婉側。極似片玉詞。山來曰：忼慨悲歌。纏綿悽惋。直欲敲碎唾壺。

小諾皋

輓尤展成夫人。

德耀眉齊。少君車挽。十載牛衣人淚。憶當年白恰翩翩。比肩蘭蕙。夫子龍城綰綬。紫塞風沙難避。賦歸來還共東籬憔悴。詠絮庭閒。篝燈門閉。慰白頭佳兒佳婦。百歲相看何已。蝶夢醒。偏無幾。日下蒲輪。江邊桂楫。驚起山中濃睡。全不管西風病骨。懨懨情思。環珮珊珊去矣。垂老寧堪傷逝。轉眼便泡影空花相似。綺戶絲縈。鏡奩塵細。怕黃昏微雨疎簾。滴到愁人兩耳。更莫聽蛩吟碎。

鳳于曰：繁音哀亂。似溱江夜奏。不堪終曲。山來曰：可作賢媛小傳。

哨遍 題萬柳堂。

何處嬉春。踏青挑菜。鄂杜城南地。過危橋夕照恰當門。亂擁入羣蜂螺髻。鬱坡陀。綠遍粘天芳草。粼粼十畝風潭水。看萬縷千絲。交柯接葉。掩映長空無際。問當年誰折永豐枝。已彷彿靈和殿裏時。欲起還眠。帶雨拖煙。呢人情思。是相

國滄洲逸興。萬象含生氣。忘機魚鳥穿林。啖影任遊戲。更石笋排雲。花香作霧。東風一剪。靡蕪翠。梁苑詩篇。西園賓從。點綴平泉佳麗。羨新荷驟雨。遺踪如此。似歐冶池邊。溯漣洏。恨只少。貧簪谷意。喜得賜沐餘閒。小駐東華騎。河上清明。洛濱祓禊。油壁鈿車來矣。年年渲染。費春工。且自與人同樂耳。

武會曰。二百一十字外。尙似有餘。此長調中能事也。諸家無此筆力。輒以狹巷短兵移之車騎之地。鮮不敗矣。書樵曰。是爲鐘呂大聲。不同絲竹細響。

鶯啼序

送牧仲權  
稅贛關。

憶隨羽林十二。作英雄指顧。正補袞黃閣初開。城南尺五韋杜。屬車下參差豹尾。新豐樹杪旌旗度。佩雙鞭馳電。長河馬嘶冰路。獵騎纔回。小篆乍裊。誦琳瑯好句。讌梁苑賓客鄒枚。勝流齊奉樽俎。泛扁舟重尋赤壁。是玉局舊曾遊處。嘆臨皋一段風流。杳然千古。京塵再染。屬國旂常。九賓看拜舞。又移入白雲司裏。鷄舌香賜。綽約雙鬟。旗亭歌賭。衍波紙寫。驚心動魄。廣平冰鐵梅花賦。問

枝頭紅杏今能否。銅龍命下。持衡賤布。寶錢片帆欲飛南浦。清江似鏡。章貢  
分流。是天開大府。最好向鬱孤臺上。極目夕陽。幾道蠻煙。亂垂平楚。乘槎漢使。  
登樓清嘯。驚濤拍拍千尋下。聽榕陰木客吟詩苦。載將廉石歸來。滿酌蒲桃。歌  
翻舊譜。

其年曰：章法絕妙。是廬陵一篇送行文字。一起陡健舉。  
山來曰：石破天驚。洵可推倒一世。開拓萬古。

# 珂雪詞補遺

卜算子  
秧針

欲製水田衣。難學天衣縫。倦繡空中亂唾絨。點點楊花弄。  
卓影刺波明。補得青莎空。乞巧穿來定幾時。秋老無人共。

浪淘沙  
午夢

午夢費追尋。行遍園林。落梅如雪滿庭陰。粉蝶遊蜂紛去住。又是春深。  
鄉信抵黃金。雲水沉沉。先生老矣廢長吟。喫飯著衣些箇事。忙到如今。

又詠  
史

秋老伏波營。海氣淒清。鷓鴣啼上越王城。玉几金床何限恨。紫殿苔生。  
霸業總飄零。青蓋亭亭。五千甲楯憶行成。回首羊車遊幸地。多少娉婷。

木蘭花

重九發  
皖城

黃昏急雨跳珠露。五兩迎潮打槳去。煙螺一點認龍山。暗憶西風吹帽處。魚  
床鱗斲紛無數。夜火陰沉隔江步。寒蘆颯颯走濤聲。十萬饑蛟爲誰怒。

春草碧

題梅雪坪  
小照

春風作意淹愁客。啼髮弄琅玕。千條碧。脉脉空谷佳人。翠袖無言鎖相憶。過雨  
嫩苔生。流光濕。莫是擁髻燈前。翩然獨立。認他桃花紅。梨花白。劇憐畫裏都  
官。朱霞天半無人識。高唱紫雲回。消受得。

滿江紅

詠青陽署  
中老桑

輪囷離奇。常自是參天溜雨。髣髴似龍纏蛟鎖。獸蹲鯨怒。衣被神功。歸草木。絲  
綸大業生機杼。笑倡條冶葉亦何爲。紛如許。溝中斷。青黃取。冥靈壽。蹉跎補。  
幸斧斤不到先生宥楮。定有煙霞興左右。何年廟社煩鐘鼓。數春秋。又過八千

餘喬松侶。

百字令

婺源道中  
記所見。

濕雲潑墨。儘連宵做弄。碎瓊零玉。灘雪驚飛流不定。軋軋水車翻軸。山鬼荒祠。女郎遺廟。擬聽秋墳曲。亂鴉枯樹。峯腰猶抹青綠。莫是洪谷雲林。匆匆渲染。健筆能醫俗。一縷炊煙來木末。籬落人家堪宿。烏柏紅銷。樓欄葉散。掩映千竿竹。數杯濁酒。敵他簷際風肅。

木蘭花慢

題文孝  
祠壁。

拜昭明遺廟。臺下水。自淪漪。想文選樓中。銅龍晝暖。玉簡宵披。攜詞六朝金粉。遍千秋作者。沐恩暉。兆始乘雞牽犬。禍成白馬青絲。靈旗雜佩。葳蕤鼓坎坎。舞傲傲。嘆故國山川。鄉人伏臘。舍此安歸。追維湘東太忍。使江陵文武。盡灰飛。但奉九郎神在。重遊幾度沾衣。

臺城路

爲熊封題金陵  
覽古詩卷

騎驢踏遍臺城路。秋風更兼秋雨。朱雀航邊。莫愁湖畔。有底關情如許。英雄割據。歎鐵鎖銷沉。龍驤飛渡。彈指聲中。匆匆暗送六朝去。金床玉几。盡變涼瑩。滿院動人愁處。夢裏三生。奈何頻喚。禪榻髻絲千縷。精靈虎距。和冷雁哀猿。江山重數。嗚咽寒潮。蘆花飄正苦。

附 滿江紅  
前題

濂 廉水

滿紙閒愁。一似聽深夜杜鵑。知君過石頭城下。玩弄吟鞭。細雨看山。春草路。斜風貰酒。夕陽天。儘六朝金粉。寫新詩。雲母箋。青溪水。生暮煙。白門樹。倦飛綿。憶梁州子夜。歌舞當年。兩岸衣香調錦瑟。一江花氣。浸紅舡。問舊時桃葉。與桃根。情暗牽。

金明池  
前題

霖 掌霖



絮帽穿花。雨襟問渡。踏遍烏衣巷陌。歎此地閱人多矣。夕陽裏何限陳迹。任閒吟斷粉零香。早十幅蠻箋。怨紅愁碧。謾凝想當年。銀床金井。一片胭脂痕濕。我亦飄零江南客。便玉樹歌聲。怕教聽得。青溪岸荒苔露草。桃葉渡冷煙寒日。悵平湖春水茫茫。問甚處曾窺。脫娘顏色。且小拍紅牙。將君法曲。譜入一枝橫遂。

買陂塘

前題

霈  
叔甘

悵年年。攝山欵帽。柔情如水難賦。羨君青鏤江花燦。寫出興亡無數。吟斷句。愛解道。畫樓簾幙春風度。英雄兒女。算藻井雲廊。金戈鐵馬。寂寞少尋處。問何似。子夜歌聲淒楚。疑聽哀弦危柱。莫教喚起蕭陳客。重怨幽香冷雨。朝又暮。任空打石城鳴咽。寒潮怒。江村煙樹。待白舫期君。一篙兩槳。共泛莫愁渡。

珂雪詞 補遺

六

金縷曲

前題

湛季沖

醉舞纏絲綃。把新詩琅琅吟向。碧天寥廓。結綺臨春皆塵土。何許畫簾珠箔。  
休更問孔張眉角。白石無情紅袖冷。正關卿何事思量著。秦淮水。尙如昨。  
無端三歎從中作。歎銷沈文章庾鮑。風流昉約。幾曲紅牆零亂處。愁見宮槐  
葉落。賸蕭寺夜魚風鐸。獨抱琵琶彈明月。一聲聲彈出白翎雀。驚。歛。歛。響秋  
籟。